


特 別
^18
4892
14





八 18
4892
14

明詩綜卷三十七



小長蘆 朱彝尊 錄

淮浦 楊 雯 緝評



陸 鈇 五首

鈇字舉之鄞人正德辛巳賜進士第二授編修
出為湖廣按察僉事轉江西督糧參議山東提
學副使有少石子集

靜志居詩話崑山陸鼎儀鄞縣陸舉之其名同賜進士第二人同一從
史館出為太常一從史館出為外臺適相合也鼎儀盛有詩名詩却平
平舉之不以詩名而詩似勝於鼎儀其督學山東也見山東舊無通志
而曰周公孔子百世之師也六經斯文之祖也泰山五岳之宗也此一
方文獻而天下古今之事備焉志奚可廢也
乃編緝成書河山十二得公數言而增色矣

建昌道中

月寺宗卷三十七

赤阪揚塵霾朱旆轉炎熾下有脩竹林清泉蔭涼翠行
子苦鬱蒸居者自幽憩豈為躁靜分亦緣身世異東門
瓜已稀南山豆堪藝回車理故岑願言遂高致

愛峰篇

愛山愛孤峰峰高不可即誅茅卧其旁憑軒看空碧裊
裊金芙蓉海霞蕩日夕下有蛟龍盤波濤起淵宅浮雲
倏蔽虧白日慘無色蔽虧良有時我情終不易請看石
上蘿網繆自今昔

妙高臺

石徑入迂迴高臺出林杪遠岫迎歸雲層巒礙飛鳥厓
崩樹交撐壇靜花不埽凌風一振衣清曠絕塵抱仰接

煙霞重俯視樓觀小安得鞭蒼蚪翛然下蓬島

錢唐懷古

黃屋南遷日蒼山結鳳樓可憐江海地曾是帝王州鐘
梵傳宮樹笙歌恣客遊寒潮自來往難雪古今愁

謁文山祠

丞相名高宇宙垂螺江合有報恩祠運移諸葛身殲日
義盡睢陽力竭時戎馬中原空下淚松林異代尚南枝
彌天碧草傷春色楚賦招魂有所思

張孚敬一首

孚敬初名璉字秉用永嘉人正德辛巳進士上
疏言大禮除南京刑部主事再上疏超擢翰林

學士陞禮部尚書兼文淵閣大學士歷少師兼
太子太師吏部尚書華蓋殿大學士贈太師謚
文忠有寶繪樓和御製詩蘿峰集

詩話蘿峰不由史館起家特授學士又以議禮為持名教者所輕以是
嫉詞林特甚尤惡詩人文人八才子無得免者此諸夏嚴更覺深刻

恭和御製翊學詩

聽講大學
衍義作

帝王治有道修身宜所先於皇聖天縱受命真白天
陋彼霸功小愛此王道平經筵講大學治法三代前乾
乾自不息安安而能遷升堂入其室登山陟其顛擴之保
四海泉達火始然卓哉真德秀義能衍斯篇微臣忝進
講膺服同拳拳

張治 三首

治字文邦茶陵人正德辛巳進士改庶吉士授
編修以左贊善使交南進學士陞吏部左侍郎
掌翰林院事拜南京吏部尚書入為禮部尚書
兼文淵閣大學士加太子太保卒贈少保謚文
隱改謚文毅萬曆初復改謚文肅有龍湖詩集

王元美云張文邦如藥鑄鼎燦爛驚人終之古雅 顧
玄言云文肅才雄思贍袖緒錯彩爰然衡岳之秀

詩話吳有洞庭山名也楚有洞庭湖名也郭景純賦云爰有包山洞庭
巴陵地道潛達旁通幽岫窈窕蓋謂君山有石穴通吳之包山故包山
亦以洞庭名鄺善長注水經二湖俱以洞庭為目誤也張文肅夜過洞
庭詩云曉發吳閶門夕渡廣陵津日暮江帆遲洞庭三百里微風澹無
波明月照天水隱隱見君山鐘聲翠微裏是吳地也而混於楚矣善長
此人未析南條諸水文肅家茶陵與洞庭湖密邇豈得以君山屬吳邪

雜興

望湖亭下水如天曾是宣皇賜幸年玉輦不來鳧鴈冷

一湖楊柳鎖春煙

登石鍾山望廬山

廬岳亭亭翠萬重懸泉千尺挂飛龍石鍾山下江如鏡
映出青天五老峰

送鍾時亭之南雍

霜落燕山萬木稀君行歲晚欲何依十年空獻君王策
猶向橋門著布衣

李默二首

默字時言甌寧人正德辛巳進士改庶吉士累
官太子少保吏部尚書兼學士贈太子太保謚
肅愍有羣玉樓臺

秋夜泊下邳值雨

濁河元楚塞古驛自秦城旅泊河山異飄零風雨生波
濤喧獨枕鐘鼓暗深更秋事方蕭索應知歲晏情

月下

鐘鼎非吾事神仙亦世稀停杯忽惆悵明月上人衣

黃佐十一首

佐字才伯香山人正德辛巳進士改庶吉士授
編修出為江西按察僉事調廣西召入為左司
諫歷侍讀諭德國子祭酒少詹事兼翰林學士
卒贈禮部右侍郎謚文裕有泰泉集

屠文升云才伯詩會詮條貫近體雄深麗逸旨遠格精樂府古詩兼總古今出規入矩張崇象云才伯博極羣書而能反約於心其詩穎出流俗質鉅而力雄陳師孔云

日言總卷三
泰泉摘詞酌雅取材於西京割正於李唐研精於南宋其言與以文其
思婉而微粹然一出於正 王元美云黃才伯如紫瑛石大似靺鞨晚
年不無可恨 顧玄言云詹事性尚冲和韻含芳潤譬之龍躍懸河
鳳鳴阿閣輝映高絕信足接武曲江 陳卧子云才伯亦窺見格律
詩話文裕撰體頗正而取材太陳故格雖聳高而氣少奔逸然嶺表自
南園五先生後風雅中墜文裕力為起衰如黎維敬梁公質輩皆其弟
子嘉靖中南園後五先生二子與焉蓋
嶺南詩派文裕實為領袖功不可泯也

學古贈胡承之歸關中

翩翩雙鳴鴈 噉噉雲中飛
娟娟蛾眉女 札札流黃機
棄置不成匹 歎息減容輝
問女何所歎 良人悵有違
萬里遙相望 何由接音徽
蕙樓鑒素月 蘭燈暖虛幃
身非驂與服 安得同車歸
河清尚可俟 會合何可希
臨岐奏此曲 淚下誰能揮

碧梧丹鳳圖為黎侍御一卿題

鳳兮鳳兮爾來當何時
知爾之德萬古長不衰
不然上天縱爾九苞羽
安用琿璫為君不見桃
蟲當日飛為鷗脊令原
上啼鷓鴣鳥几几音曉
曉室家恐為陰雨漂偃
禾風定杲日出岡上碧
梧寒不凋爾於此時來
和鳴叶簫韶成王優游
君夙喜卷阿為爾歌且
謠鳳兮鳳兮披圖對爾
起三歎久矣不夢周公
旦咸陽宮前多枳棘何
用屑屑悲秦漢

南征詞 三首

鳳野傳清蹕 龍旌逼絳霄
風雷隨鼓角 日月耀金貂
躍馬宜春苑 呼鷹織錦橋
何如穆天子 空賦白雲謠
翠網張瑤浦 黃旗漾碧流
殷勤供廟薦 蕭灑事宸遊
御

氣通鮫室祥煙化蜃樓魚龍應自喜何敢負王舟
柳映金陵暮花搖玉帳春江淮明燬火閭闔動梁塵祕
戲徵西域迷樓構北辰三千歌舞伎誰似掌中人

雨

膚寸雲初起彌天雨正狂魚龍空窟宅草木各輝光爽
氣連南紀愁陰接上方故山青未了歸夢此宵長

對月

江月初成鏡山城獨倚樓徘徊如伴客浩蕩更隨舟陌
上清光滿樽前爛熳遊豈知離別後對爾轉添愁

彌羅閣秋望與馬子仲房

羽觀臨霄漢飈臺出薜蘿霞觴延客久琪樹受涼多日

色隱平楚秋聲連大河君看愜幽意吾醉即狂歌

春夜大醉言志

拔劍起舞臨高臺北斗插地銀河迴長空贈我以明月
天下知心惟酒杯門前馬躍簫鼓動柵上雞啼天地開
倦游却憶少年事笑擁如花歌落梅

錢受之云公自注云欲盡
理還之喻王元美云此
公作美官講學恐
人得而持之故也

宮怨

上陽宮殿倚雲霞天外時聞度翠華魚鑰重重鎖窗戶
夜來春雨到梨花

采蓮曲

隔花相見兩徘徊蕩槳低頭笑不來雙棲白鷺忽驚起

遙見浮萍一道開

王用賓 一首

用賓字元興咸寧人正德辛巳進士累官南京禮部尚書有三渠集

出塞

賀蘭山下羽書飛廣武營中戰馬肥壯士爭誇神臂弩
打圍先射白狼歸

何棟 二首

棟字伯直長安人正德辛巳進士選授河南道御史諫宜興知縣陞順天通判轉工部郎中歷右通政太僕寺卿以左僉都御史撫大同左遷

四川參議用薦起右副都御史提督薊州加兵部右侍郎轉左侍郎進右都御史有太華集

玉泉

鬼斧何年鑿仙源此日看濺珠翻石溜拂鏡流晴瀾鸚鵡春塘淨雲霞夕影寒分流入內苑故作九龍盤

登真覺寺浮圖

凌空垂寶塔披霧出銅盤影照青蓮色光寒白露團霞標窺日近風洞洩雲寒靜坐觀空界天花遶石壇

廖道南 一首

道南字鳴吾蒲圻人正德辛巳進士改庶吉士授編修歷侍講學士謫為徽州通判尋復職有

玄素子集

王元美云廖鳴吾如新決滄浮楚濁泥一瞬皆下錢受之云廖才名其著詩無淺不足錄其質純轄句束字易於滯澀

靜海遇張汝禎夜話

日夕繫蘭橈山城圍海縣嵐光互明滅水霧遞隱見涼月鑒廣原靈飈振芳甸幽人抱遐心踟躕夜將半仰觀河漢流俯察昆蟲變側聞哀鴻音攜手淚如霰

童承敘一首

承敘字士疇一字漢臣沔陽人正德辛巳進士改庶吉士授編修進侍講歷中允司經局洗馬國子司業左春坊左庶子有內方集

詩話庶子與張文邦廖鳴吾號楚中三才永陵以從龍侍臣選之詩篇比廖差優論者擬之夏雲秋水不可方物失其倫矣

臨清雜興

健兒新殺雲中將殲騎長驅塞北塵遂使龍顏憂朔漠遠分虎旅出咸秦推誠詎識皇心厚不戰應知廟略神萬里風煙勞極目安危須倚近邊臣

倫以諒一首

以諒字彥周南海人正德辛巳進士改庶吉士歷官南京通政司右參議有石溪集

詩話嶺表科名之盛莫若南海倫氏自諭德文敘會試殿試俱第一其子祭酒以訓會試第一殿試第二通參以諒鄉試第一與郎中以諒皆二甲進士出身然諸公文詞皆各有集傳者特少其後人亦無繼起者昔王筠論家門謂崔氏雕龍不過父子兩三世非有七葉之中人人有集如吾門者以是知古人所重者著述科名不足較也白山以訓自號穗石以諒自號

舟中夜坐寄弟白山穗石

秦淮煙月蔣山雲回首金陵隔紫氛別浦停橈渾不寐
孤城吹笛詎堪聞春來花看同鄉樹嶺外鴻歸逐舊羣
何事人生獨惆悵百年岐路幾回分

張袞 三首

袞字補之江陰人正德辛巳進士選庶吉士授
監察御史復改翰林編修歷侍讀諭德進侍讀
學士遷太嘗寺卿掌國子祭酒事左遷南太嘗
少卿終南光祿寺卿有水南集
奉和順之陽溪別業之作

千峰羅杖底選勝武夷旁夜雨蘼蕪徑春風薜荔牆
渠分海色種竹隱嵐光會發王猷興籃輿就辟疆

陪衍聖公祭先師廟

鸞鳳趨蹌地笙鏞迭奏時千春王者祀百世聖人師禮
器羣賢別宮牆數仞宜上公詩禮在釋奠有新儀

寄樊僉憲一賢

同是三湘放逐臣歸來猶自厭風塵長沙日落秋陰滿
愁殺當時痛哭人

王同祖 一首

同祖字繩武崑山人正德辛巳進士授翰林編
修進司經局正字遷國子司業有五龍山人集

王元美云繩武詩佳往
朗秀玄著春容爾雅

涿鹿遇杜道士

晚渡桑乾水西風匹馬過寒城歸鳥急古道夕陽多
邂逅班荆地蕭條伐木歌
息息更南北回首意如何

周祚 三首

祚字天保紹興山陰人正德辛巳進士除來安

知縣擢給事中有定齋集

孫仲可云詩以拔去陳故為尚天保樂府婉而厚古詩醇而鉅

近體脫略纖冶非自空同出邪錢受之云空同崛起東南士大夫多心非其學天保自越中走使千里致書稱弟子南方之士北學於空同

越則天保吳則黃省曾也

詩話給事同懷兄弟四人皆取甲第而能不戀執官遠師北地游心風雅即其不以門望驕人可以傳流激薄矣集四卷玄孫工部郎襄緒刊

之行

雜詩

二儀愆恒運日月斯晦蝕陰陽靡協和風雨失其職天

道垂常象君子重刑式百揆理四時允為天子翼一物

苟失所憂懷動顏色邈哉古聖賢旁招暨幽側重華闢

四門尼父取三益周公致太平吐哺不終食

吳偉畫冊為成中丞題

國朝畫師能悉數筆力孰過江夏吳眼前富貴王侯無

故能瀟灑超其徒或時酒酣赤兩足亦或脫帽空頭顱

五岳四瀆生斯須一峰忽從天際拔九派真見江流趨

中丞何由得真蹟列方布冊看有餘清秋示我閭山下

白日宛坐仙人區由來神物易飛去九苞之鳳不在笈

昨聞九月雷電作滄海恐失珊瑚株

后峰

落日滄江返照來江光倒射碧山隈山人愛聽楓林響
月滿柴門未肯迴

張達一首

達字懋登餘姚人正德辛巳進士改庶吉士授
刑科給事中坐劾郭勛李福達謫戍遼陽卒贈
光祿少卿有義樂集

新年

磁甕三杯酒方牀一覺眠天涯萬里客如此過新年

謝贊一首

贊字維盛閩縣人正德辛巳進士除禮科給事
中以議大禮廷杖又劾張桂儉邪不可用奪俸

尋命出知太平府未上官卒于道隆慶初贈
常少卿有給諫集

白沙月下感懷

野曠霜空萬木凋歲寒孤櫂傍清宵江聲永夜驚虛枕
月色中天上遠潮千里風煙勞夢想十年心跡媿漁樵
白沙翠竹情無奈玉宇瓊樓望轉遙

馬駁一首

駁字抑之上蔡人正德辛巳進士除兵部職方
主事改監察御史有著臺集

詩話著臺有意法
古特章句未道

阻雪張橋驛懷徐道長

人生如浮萍同生水一涯聚者忽焉散合并安可期豈
不憶王孫芳草迷路岐客持雙鯉至云是美人貽與我
期何所乃在淮水渚忽忽玄雲浮雨雪一何滋駕言思
往從徑滑馬行遲相隔匪遠道無緣接高辭始願既已
違延竚益淒其

楊言一首

言字惟仁鄞人正德辛巳進士除行人擢禮科
給事中言事廷鞫謫判宿州久之遷吏部郎
再謫知夷陵州三遷至湖廣參議落職有集

堂云先生詩
婉秀明麗

行舟次朱雲巖

迢迢山障月寂寂鴈汀秋百丈牽三老千峰送一舟窮
援相叫嘯祭獺互沉浮不是巫山路空餘楚客愁

任溥一首

溥字元朴堂邑人正德辛巳進士官監察御史

野渡

潦深望不極問渡莫悽然漁笛蒹葭裏因風到客船

邵經邦一首

經邦字仲德仁和人正德辛巳進士除工部主
事改刑部署員外郎建言廷杖發鎮海衛充軍
有弘藝錄

詩話孔嘉以議禮驟貴繼為陸子餘所劾業勒歸矣尋即召還會陽月
日蝕先生上言議禮貴當用人貴公陛下私議禮之臣是不以所議者

明言錄卷三十一
為公禮也夫禮惟當乃可萬世不易使所議非公則禮可守也亦可變
也可成也亦可毀也陛下果以禮為至當欲子孫世守莫若厚其賚予
全其終始以答議禮之功然後轉選碩德置諸左右使萬年之後廟號
世宗不亦美乎永陵震怒既于杖復下獄發邊衛充軍明之列辟永陵
猜忌之尤李襄愍以漢武帝唐憲宗發策猶難免於瘦死矧以人主生
前臣下輒敢預為擬謚乎沈孝廉景倩疑世宗二字默契宸衷遂從末
減亦未必然予謂先生幸言之於嘉靖初年爾使在西內營齋之日則
斷不能保首領矣先生詩少敦琢第七子盛行之日不治其流派正見
鯁骨處

四十明朝是

四十明朝是頻聞畫鼓槓殘燈持自照忽吐兩三花

敖英四首

英字子發清江人正德辛巳進士除南刑部主
事出為陝西提學副使改河南終河南右布政
使有心遠堂橐

熊閣泉云方伯詩興幽思
遠盡絕蹊徑足稱名家

塞上曲二首

軍中頻宴樂醉後擁雕鞍紫塞連天遠黃雲拂地寒羌
兒叱撥馬胡女固姑冠逐隊營門立春風倚笑看
無定河邊水寒聲走白沙受降城上月暮色隱悲笳玉
帳旄頭落金微鴈陣斜幾時征戰息壯士盡還家

別業漫興

門對寒江舊不斜旋開三徑學陶家秋來不問登高節
日日攜壺醉菊花

輞川謁王右丞祠

蜀棧青驪不可攀孤臣無計出秦關華清風雨蕭蕭夜
愁殺江南庾子山

黃潤 一首

潤字以誠晉江人正德辛巳進士官至參政

孟秋

玉衡指孟秋階前鳴促織光陰良易邁坐覺老來迫四十道未聞眷言心孔盡空死讀書螢徒取譏有識迷塗幸未遐周道矢焉直千里雖云遙終當勵餘力

田頊 一首

頊字太素龍溪人正德辛巳進士歷禮兵二部

郎中湖廣僉事貴州提學副使有秬山集

即事

聞道迷陽寇東屯信不虛風雲隨戰伐天地日丘墟列

峒分旗鼓行營接羽書哀哀荷及子生計本樵漁

吳檄 二首

檄字用宣桐城人正德辛巳進士除襄陽推官入官戶部主事歷武選郎中出為湖廣參議轉山東雲南副使終陝西參政有皖山集

詩話王道思官司封郎為當國者所不悅謫判毘陵嘉靖乙未三月之望朝士出餞於海淀者八人唐順之應德陳東約之張元孝少室李遂邦良李開先伯華熊過叔仁呂高山甫其一則用宣也海淀在阜成門外其地為張昌國園林昌國罹禍之後亭臺悉圯諸公置酒為之不樂惟用宣詩先成所云絃管不隨流水奏綺羅應化暮雲飛者是也夏桂洲聞之遂劾元孝遂二司官無事漫游竟下獄七人者相次罷謫惟用宣幸免爾何元朗述顧東橋赴嚴分宜飲升堂竟上座酒行嫌冷不堪既易酒至又嫌太熱指顧揮霍不知有主人而分宜執禮愈恭因謂使桂洲當此則東橋不免有雙江之禍矣蓋嚴夏皆媚嫉而當時之論若似乎夏之傾陷有甚於嚴者觀伯華海淀詩序則桂洲西市之禍朝士未始不有快意者矣

春日

黃鳥鳴高樹春聲滿鳳城憐予長作客聞此倍含情何處步芳草出門逢友生東風隨杖屨迢遞晚山晴

甲午冬過荏平聞吳叔羽癸巳五月卒哭之

南歸曾得蜀中書道爾平安守故廬荏縣忽聞摧折久草堂翻恨往來疎家貧妻子應難給歲晚朋儔日已虛都下送君成永訣忍看詞賦哭相如

張羽一首

羽字子儀崑山人正德辛巳進士刑部郎中有集

雜言

蜀巖好沉冥日食止百錢卜筮人所輕久之操彌堅君子有所貴乃不在當年百世有知音何必鍾期然子雲太區區譽之公卿間卑哉益州牧乃欲吏高賢豈無王侯貴敢言不敢言斯道誠兩得永為後世傳

陳大濩 二首

大濩字則殷長樂人正德辛巳進士思恩府同知有雙溪集

十五夜舟中對月

水國人初靜江村月漸高九天開霽色百里見秋毫興已懷鱸膾官猶滯馬曹孤舟對清夜湖海思滔滔

朱仙鎮岳武穆祠

駐馬朱仙鎮傷心武穆祠誰憐宋社稷竟失漢旌旗星
墮天應憤師班帝豈知空餘祠外柏蕭索向南枝

浦瑾一首

瑾字文玉無錫人正德辛巳進士麗水知縣有

桂巖集

詩話文玉晚而通籍牽絲作宰之官三日而病三月而徂故邵國賢深
惜之詩如池萍漲雨青浮岸鄰樹分陰綠過牆林迴微風生木末江空
落日上簾鉤日斜天外初微雨雲
薄樓西忽斷虹頗與國賢同調

閒居漫興

萬里橋東一草堂烏皮隱几竹方牀池萍漲雨青浮岸
鄰樹分陰綠過牆乳燕出時炊麥熟繭蛾飛後曝絲香
不知何處炎蒸在日日清風灑葛裳

張含六首

含字愈光永昌衛人正德丁卯中雲南鄉試有

禺山詩選

楊用脩云愈光未中能詩及長博極羣書條入葉貫上
徹漢魏下汲李杜弗工弗庸弗似弗止然工於求古味
於適俗寄贈窮困節義之交萬言不竭於通達周旋之友片言即窮
任少海云愈光詩險怪詰屈不必皆中繩墨 王元美云張愈光如拙
匠琢山骨斧鑿宛然又如束銅錮腹滿中外遺 穆敬甫云張若藻麗
精深殊有襟度 顧玄言云愈光如蘭津天矯騰逸浮空若鴻鴈不傳
天外字芙蓉空照水中花銅柱兼葭鴻雁響鐵城煙雨鷓鴣啼此例數
篇非雕飾曼語 葉元禮云禺山詩如峽中女子野花山葉翠盦銀釵
非不飾姿弄粉拭粉
游紅奈時作蠻語
詩話禺山雖北學於獻吉然詩不盡出其流派而一以用
脩為歸觀其襍積字句乏自運之神方之用脩遠不逮也

戾虫謠

嗟哉猛虎橫行道阻我欲射虎誰藉我弩我欲殺虎誰
假我斧悠悠蒼天寧獨予苦

峽中

夔州城下陰霏霏我寄客船他夜歸越舸蜀艇幾烏桤
赤甲白鹽雙翠微煙蘿一帶野猿嘯石壁萬仞明星稀
三巴迢遞望三楚京洛紅塵愁滿衣

己亥秋月寄升菴

金馬秋風十載餘芙蓉深巷閉門居登樓莫作依劉賦
奉使曾傳諭蜀書卧病可憐天一柱獨醒無奈楚三閭
北來消息風塵斷白首滄江學釣魚

覽升菴舊時辭翰兼紆別懷

蕭條別館君為客寂寞荒村我閉關鸚鵡洲邊空作賦
鳳皇池上幾時還羈身萬里棲填海歸夢三更過蜀山

此地斷金俱白髮往游傾蓋正紅顏

寄升菴

公子思歸幾歲華王孫芳草徧天涯樓頭豔曲包明月
海口新鉛蔡少霞自注升菴近撰海口碑文極奇光祿塞遙空遮鴈上林枝
好只棲鴉夢中記得相尋處東寺鐘殘北寺斜顧惟賢云集中絕唱

春暮

春暮南溪花氣香亂峰驚蝶不成行漁竿在手不須放
釣得鯉魚三尺長

鄧敲二首

敲字文度其先松江華亭人徙常熟中正德丁

卯舉人

錢受之云文度詩學昌黎東坡不屑時調

詩話文度歌鹿鳴後喪母遂不上公車以通經博古為務嘗與客論文其大略云文章粹於經聖賢以其精蘊而形諸辭辭可以已聖賢必無事於作焉者不得已也三代而下放臣棄婦之辭讀之尤足以興感者性情也今之為文者無古人之性情與其所遇之時事辭與意背以諛為容以聚為約浮濫而無法則可以無作或言西京之文近乎古不知壞古人之文者揚子諸人有責焉書出陸子餘歸熙甫皆是之當嘉靖中伯安道思應德既往于鱗元美明卿伯玉本寧之派盛行詩古文交失其真文度之論其力挽元氣者與詩亦崛奇不治七子之習

致道觀七星檜

琳宮何岵嶷爽氣凌青蒼中有古檜樹傳植自蕭梁歲遠四樹存如斗酌天漿東株久已朽慶曆補其亡中株麗瓊壇少日嬉其芴今已翦不遺取斧斯其香兩株在東南偃蓋覆修廊攢枝細而密葉聚如鍼芒兩株在西南赤立膚無霜偃蹇捎殿角督力示堅彊北株最怪異不與羣木行質幹盡屈鐵天矯互低昂四檜皆左紐枝

柯鬱相望霽晴亦慘黯昏黑常晶光蜀廟青銅柏涿郡羽葆桑圖經儼封殖况我桑梓鄉石田昔塗寫遺墨好事藏聊復陳我歌我歌亦堂堂

雷殿画壁

致道古仙都山水夙清美雷宮設像画種種盡其技淳古出道逸意態得深旨左壁挾風雲沙礫卷空起有神操火具張目怒獰視當其燄所及妖窟泣神鬼右壁已淋落雲氣來纏纏似聞轟雷車不遑掩其耳南壁雲參覃電光閃復止有神被甲胄驅偉顙舊紫執爰見真宰如以職備使北壁方晦冥相去不辨咫尺有神手天瓢九龍運其水勢欲翻河波雷伯鼓未已靈祠木清肅長夏

頽無泚入門見粉墨鮮不生戰憚乃知藝事能凝神始
臻理吳生貌地獄施帛日雲委惟以神妙故見者雜悲
喜茲事已千年遺跡久零圯茲僻雖尚完能保後無毀
誰為補圖人三歎遜前軌

汪本一首

本字以正歛人正德丁卯舉人有西巖集

王仲房云以正

童穉即解為詩弱冠挺興遂傳高唱潛思取境不落常情天不愛才壯即天折惜哉

詩話十岳山人王寅輯新都秀運集以本詩壓卷稱其愁邊草木歇夢裏關山多之句蓋是時新都風氣咸以篁墩為宗本獨以古為師故亟取之

旅邸述懷

歲月秋將晚風塵鬢欲華孤雲天外影寒菊夢中花濁

酒賒難得滄洲興未涯何當返初服歸駕鹿門車

吳益夫二首

益夫字惟裕閩縣人正德丁卯舉人武學教授
有古迂集

晚歸

夕陽下西林草徑含暝色鳴蜩在深樹向晚猶不息歸
騎且遲遲中天雲未黑

喜晴

朝日麗郊原晴風動梧竹沙鷗不避人飛來傍船浴

于震一首

震字孔安餘姚人正德丁卯舉人知福安縣

罪言

北來軍壘幾時平官府無人解治兵豈謂干戈是凶器
本來樽俎屬書生麟符玉冊權空貴鐵馬金戈勢轉橫
歎息廟堂天地隔白頭無路請長纓

管浦 三首

浦

浙士登科錄作溥

字弘濟餘姚人正德丁卯舉人官萊

州府通判

送顧宗朝還孟城

龍江木落風亂鳴龍江水邊舟欲行玉鉞酒盡不成醉
青衫淚濕難為情借問舟行向何處美人別我淮南去
海天渺渺孤鶴飛回首江東隔雲樹高堂一笑壽且康

弄雛載戲斑斕裳湖水梅花鬪清絕尋詩載酒還徜徉
我欲東歸歸未得風雨茅堂轉相憶故國迢迢千里餘
雙鯉憑將寄消息

繆天自云平穩

舟中雜興

江水白於練江花紅欲然長風一萬里吹送木蘭船

田家

豆花香暖木棉開禾黍高低秀作堆落日松風一樽酒
石壕無吏夜深來

吳天祐

一首

天祐字吉甫豐城人正德丁卯舉人官知縣
和荅同年徐豐厓

勞生會晤豈易得別十五年方一來故人幾人道相合
今夕何夕樽同開感君情深愈於舊使我樂極翻成哀
天空月明耿長夜梧葉蕭蕭飛露臺

周青士云拗體韻放漸近自然不知者以為牽率然

非解人不能也

顧彥夫 四首

彥夫字承美無錫人正德庚午舉人官河間府
通判有瀛海集

老年謠

婚嫁紛紛事俱了齒豁頭童容色槁縱是扶筇門外行
亦妨頓足風中倒白晝纔興更欲眠黃昏未飯先愁飽
著眼看花眼已花臨書戒草書皆草從容一笑淚反多

急遽數言心似擣此翁耄矣真可憐東抹西塗亦曾好
此身還可作典刑世事何須累懷抱君不見古來豪傑
多軒昂功業將成不能老

南村題柳君宗鎬卷

崇文門外四三里茅屋數間村落裏犬吠花邊驚客來
鳥投樹底知風起主翁散步幽情多點簡菑畬早晚禾
歸來一飽有餘樂勢利炎炎如我何隔牆喚過鄰家叟
野菜隨時斟白酒酒後齊聲唱竹枝不覺檐前挂星斗

和詠梅

官閣梅花冷亦開主家故暖賞春杯憑誰寄與人千里
許我來看日幾回竹外一枝風灑落琴中三弄思徘徊

如何不入靈均賦自古山林有逸材

淮陰祠

淮陰城下弔王孫心事昭昭不待論一飯尚能酬漂母
後來何忍負君恩

張 縱 二首

縱字世文高郵人中正德癸酉鄉試除武昌通判遷知光州有南湖集

朱子价云世文入楚後詩旨趣沉著超西崑之畛域闖少陵之堂室詩話南湖學詞曲於王西樓以此擅場詩其餘事如設菖蒲之菹縱有嗜者要非逸味

秋雨

秋雨中宵滴寒蛩四壁吟燈前搔短髮誰會此時心

湖上

欲理木蘭舟且檣垂楊樹沙背兩鴛鴦飛入前湖去

王希旦 一首

希旦字維周候官人正德癸酉舉人官禮部郎中有石溪集

僧院訪蔡可泉荅莊石山來韻

我欲重來此君能幾日留居然人外境已似故鄉秋別院幽芳雜諸天色界浮都無簪組意猶自問歸不

素 達 四首

達字德修閩縣人正德癸酉舉人貴溪知縣坐事下詔獄既釋補湖廣都司經歷有佩蘭集

幽懷 四首

沖懷悅魚鳥放跡棲丘樊永息誼中想方知靜者尊農
 人談稼穡穉子牧雞豚時有會心侶晤言孤樹根
 獨行清澗濱覽物懷悽惻蘭生何芬芳草掩無顏色漆
 割乃自為木伐先其直林深不可留哲人慎日是
 美人天一方游子日千里相期青雲端乃滯滄江溪折
 梅寄遠心結草酬知己野外號歸鴻淚下不能止
 五月鷓鴣鳴衆草怨芳菲堅冰翕而至碩果存其微醴
 酒嘉早決機肉迷先幾冥冥河上公流沙去不歸

桂華 一首

華字子朴安仁人正德癸酉舉人有古山先生

集

丙子重過石上

五載今重至人閒地亦幽坐深松月夜吟苦竹橋秋問
 宅憐曾舍尋山憶昔游主人無限意翻恐僕夫愁

董穀 一首

穀字碩甫海鹽人正德丙子舉人授安義知縣
 改漢陽有碧里雜存

宿靈璧連城鋪題

日暝鴉歸野色昏解鞍投榻向荒村欲聞清磬何由得
 明月滿庭空閉門 自注縣出磬石

方邦望 一首

邦望字表民閩縣人正德己卯舉人惠州推官
有平洲集

詩話表民與郭澄卿皆喜為詩林文恪謂郭學杜而短於才方學孟而學不足以充之鄉曲之言不阿所好可使掌邦國之志矣

春日別洪子

枝上曉鶯飛江亭春未稀輕舟移浦溆別酒惜芳菲風
急寒潮響天長遠岫微此時頻徙倚空憶謝玄暉

張 鉉 一首

鉉字叔治鄞人正德己卯舉人有鳳山橐

讀史

汾河簫鼓集樓船萬里巡游瀚海邊但慕蓬山連弱水
豈知烽火達甘泉侍臣只奏凌雲賦詞客虛傳出塞篇

日暮五陵原上草古今回首一潸然

陶 成 一首

成字懋學寶應人正德間舉人

寄朱存仁

別來心事不堪聞細雨孤燈獨念君短髮漸看添亂雪
此身寧得化歸雲東風楊柳題歌扇夜雨琵琶醉舞裙
幾度江干空買櫂未知何日到淮濱

詩話雲湖寫人物山水最工予嘗從喬侍讀子靜處見之歎為絕品凌谿其女婿也計偕入都雲湖語之曰聞張家灣某氏丁香花盛開子去隨我觀乎凌谿云去禮部試僅三日公無往雲湖不許明旦凌谿他遊雲湖乘篋輿徑去醉主人家五日榜發凌谿中式比雲湖還鄉人醵錢賀凌谿雲湖於席上画丁香一本尤妙絕洵曠達之士也存仁即凌谿之友

明詩綜卷三十七

明詩綜卷三十八

小長蘆 朱彝尊 錄

吳趨 黃昌淳 緝評

文徵明 十五首

徵明初名璧以字行更字徵仲長洲人以歲貢入京用薦授翰林待詔卒私謚貞憲先生有甫

田集

顧華玉云徵仲七言詩愜當飄逸唐風宋語兩相融化自是一機軸也又云文璧蔡羽徐禎卿邢參藻詞成章雅論合則雖方

古作者未能卓然而碩學茂才固今之雋傑矣 王元美云文徵仲如仕女淡妝維摩坐語又如小閣疎窗位置都雅而眼境易窮又云先生詩傳情而發娟秀妍雅出入柳柳州白香山蘇端明諸公間 俞汝成云徵仲詩似晚唐參以元調 穆敬甫云徵仲書法高一代詩亦秀雅可傳 顧玄言云待詔詩從實境中出特調稍纖弱耳 錢受之云徵仲受文法於吳原博受書法於李貞伯受画法於沈啓南而又與祝希哲唐伯虎徐昌穀切磨為詩文其才少遜於諸公而能兼撮諸公之長 陳卧子云衡山詩尚平實韻致却勝

靜志居詩話先生人品第一書畫詩次之胥臺秦氏十懷詩其一云內翰小子師卓行古人傑辭金抗幼齡解組修晚節丹青紛雲煙篇翰爛虹蜺瑚璉世所珍昭代表三絕可謂片言中倫矣先生嘗語何孔目元朗云我少年學詩從陸放翁入故格調卑弱不若諸君皆唐音也然則文之佳惡先生得失自知豈與左虛子輩妄自夸詡者比哉今甫田集詩十五卷集外流傳者尚多蓋先生作書最勤兼畫必留題予嘗見所寫朱竹即以朱書題詩其上惜無好事者廣搜為續集也曩從父維木公治別業於碧漪坊北池荷岸柳有軒三楹懸先生手書於壁即池上一詩少時諷誦至今猶未遺忘因附錄之視集中所載尤出塵瑤之表拾遺珠於滄海天下之寶當與天下共之矣

早起露坐

炎宵不能寐起坐褰絺幘星麗中天明河連曙暉涼風不滿鬢落月猶在夜中庭草木稠宿露朝未晞人生亦旦暮急景無停機撫時懷美人欲往情依依暑寒互推遷安得願無違

秋日同杜允勝湯子重游東禪寺次子重韻

人事無停機曦暉正流耀及茲東城游駕言謝紛要杪秋霽景澄寒原入高眺靜躁本無媒憂欣自人召靡靡霜蘄明歷歷幽禽調獨行心已怡况也偕二妙燕談析玄旨悲吟發孤竅一語何足稽後期真未料微風西北來冷然雜清嘯

追和錢舜舉山居圖

翠深山帶屋綠淨水通門泉石情還重丘園道自尊種莎添野色留竹護籬根樂事惟心會休逢俗子論

飲酒

晚得酒中趣三杯時暢然難忘是花下何物勝尊前世事有千變人生誰百年唯應騎馬客輸我甕頭眠

何元朗云雅致

絕似白
太傅

雪後

寒日晶晶曉溜聲中庭快雪一宵晴
牆西老樹太骨立窗裏幽人殊眼明
想見漁蓑無限好怪來詩思不勝清
江南殘臘相將盡會看門前春水生

新秋

江城秋色淨堪憐翠柳鳴蜩鎖斷煙
南國新涼歌白苧西湖夜雨落紅蓮
美人寂寞空愁暮華髮彫零不待年
莫去倚闌添悵望夕陽多在小樓前

春日游支硎天平諸山

麥隴風微燕子斜雨晴雲日麗江沙
遙尋支遁煙中寺

初見天平道上花過眼溪山勞應接
方春草樹發光華夕陽半嶺歸與急
慚媿城中自有家

夏日同次明履仁治平寺納涼

竹根雨過石苔斑鐘梵蕭然晝掩關
坐愛微涼生碧殿忽看飛雨失青山
雲分暝色來天外風卷湖聲落樹間
最是晚晴堪眺詠夕陽橫抹蓼花灣

滄浪池上

楊柳陰陰十畝塘昔人曾此詠滄浪
春風依舊吹芳杜陳迹無多半夕陽
積雨經時荒渚斷跳魚一聚晚波涼
渺然詩思江湖近便欲相攜上野航

致仕出京言懷

白髮蕭疎老秘書倦游零落病相如三年漫索長安米
一日歸乘下澤車坐對西山朝氣爽夢回東壁夜窗虛
玉蘭堂下秋風早翠竹黃花不負余

夜坐

殘月耿猶在流螢忽自飛一聲何處鶴露下欲霑衣

春日懷子重履約履仁

湖上花枝煖欲然寺前楊柳綠生煙憑君莫信春光早

寶積山頭有杜鵑

題画 二首

新霜點筆意蕭蕭不盡秋光鴈影遙雙鳥欲浮天拍水
夕陽人在虎山橋

江頭春水綠灣灣江上春山擁翠鬟老我輸他茅屋底
無愁終日對江山

池上

單鳩喚雨雙鳩晴池上柳花縱復橫好風忽卷讀書幔
及君到時春水生

蔡羽 三首

羽字九達吳縣人以太學生赴選授南京翰林

孔目有林屋南館二集

王元美云蔡九達如灌莽中薔薇汀際小鳥時復嫣然一覽而已 穆敬甫云蔡詩冲雅不俗 顧玄言云蔡九達之整秀黃勉之之典麗王履吉之華蔚顧行之之顯約陸子淵之清潤彭孔嘉之精彩可得並駕李時遠云九達薄少陵為不足法可謂蚍蜉撼樹 錢受之云九達早歲詩尚纖縟既而滌除靡曼一歸雅馴晚更沉著時出奇麗居嘗論詩謂少陵不足法聞者疑或笑之是時李獻吉以學杜雄壓海內竄竊剽賊靡然成風九達不欲訟言攻之而借口於少陵少陵且不足法則擗

檮割剥之徒更於何地生
活此其立言之微旨也

詩話杜詩韓筆百世之師也人其可自絕乎孔目於詩文高自標許以少陵不足言所著者建安西京韓柳不足言所撰者先秦兩漢今其集具在篇無妍辭句無警策此猶淮南帝前自稱寡人夜郎天末不知漢大妄人也已其自序云古之言者必有得有所得而不言與無所得而言均非也其言誠是矣第不知何者為孔目所得雖有詩賦八百餘首文二百首恒河之沙鈞金安在牧齋縱曲為解嘲其誰信諸

思田園

南方樹藝早嘉蔬當及時王官鑿冰罷忽起田園思東
郊織臺笠西郭編茅茨田家不辛苦衣食當待誰曳裾
京華塵徒然情四支

秋泉

我愛秋泉清况傍巖花滴魚游日光中倒見潭上壁
引奏後即事

金水荷花接綺軒石渠銀鑰掌中閣西崑學士封麻晚
斜日猶開左闕門

湯

珍四首

珍字子重長洲人以歲貢生除崇德縣丞遷唐
府奉祀不赴致仕歸有小隱堂詩草

王元美云湯子重如鄉三老入

城威儀舉舉終少華治態王敬美云子重詩清雅恬和與文徵仲同調而駸駸時欲度之詩話子重十試不利晚就一官其之崇德時文徵仲作澹著色山水圖送之景甚蕭遠知其人定拔俗讀浪淘沙詞直詣劉賓客神境非五岳九達所能及也

觀雨作

溫風鬱蒸溽浮陰昏混茫始迷青嶂色繼隱朱陽光霏
霏灑甘澍浥浥潤下方竹添新籜翠草起枯芰黃熙然

厚土內生意咸舒張憂時切經旱喜坐開山堂鑿彼造化機推遷自有常燥餘必反濕炎及乃回涼君子蹈恒運小人乖禮坊貪天鮮終克靜俟多徜徉

秋日遲文衡山先生不至

肅肅振飄風霏霏灑芳澍遲客向南軒徘徊倚庭樹傲裝戒星來傾曦未云赴集本有得非為物牽無乃返中路鳥鳴不相求反已每自顧四句我思鬱以煩孰克探其故沉憂抱孤景中結豈外慕申訊吐清謠殷勤待良晤

浪淘沙 二首

淮河一道達清河如此風波可奈何東岸沙崩西岸長南船來較北船多

灩澦瞿塘險未平衝沙惡浪總堪驚相逢盡說公無渡蜀道何曾斷客行

張靈 三首

靈字夢晉吳縣人

詩話孟晉狂生游枝指生之門其画山水足亞伯虎對酒一詩可稱絕唱臨終詩云垂死尚思玄墓麓滿山寒雪一林松如聆雍門之琴頑豔亦為淚下

春暮送友

三月正當三十日一壺一榼一孤身馬蹄亂踏楊花去半送行人半送春

對酒

隱隱江城玉漏催勸君須盡掌中杯高樓明月清歌夜

知是人生第幾回

題唐子畏畫卷

黃茅渚頭熨斗柄唐子好奇曾屢遊太湖煙景此絕勝
還許吾輩閒人收

凌震二首

震字時東烏程人正德中貢生黔陽儒學訓導

有練溪集

鄭芷畦云練溪詩清婉可誦

出宿

悠悠出門來戚戚念家室三里一回頭五里淚霑臆託
身百年中何必遠行役上攀猿鳥道下俯鮫人宅性命
不足憐仕宦亦何益卓哉有陶公千載為我則倦鳥思

舊林翩然返其翻

捉蝨

我先老妻眠解衣置熏籠老妻為捉蝨略與捕賊同明
燈集女黠獲多者論功先之以緣督次則殺縫中芻蕘
與奧討指瘡兼牙攻聲言具湯沐會使巢穴空我聞雖
不語慙恧無地容彼貴寢狐貂彼富錦繡蒙旬更月必
換日夕沉水烘何緣有胎媒使汝得潛蹤乃我衣垢敝
遂為汝所宮澣濯既不時煬竈亦何功再思也不然肉
甘汝攸從昔有嵇叔夜矯矯其猶龍又有王景略古所
謂英雄伊豈乏富貴汝視如寒窮侵肌啞膚理戢戢攢
銛鋒爬搔未始歇捫撮當王公吾何為汝諱不汝飢餒

供

陳鐸一首

鐸字大聲下邳人睢寧伯文之曾孫世襲指揮
家南京有秋碧軒香月亭詩集

卞華伯云大聲詩用意和平不務雕刻深入虞
楊范揭之閩奧而漸登盛唐作者之階梯 錢受之云大聲以樂府名
於世所為散套穩協流麗被之絲竹審宮節羽不差毫末居第之南有
秋碧軒七一居精潔絕塵與勝流談讌山水仿沈啓南自為詩
題其上人知大聲善樂府不知其能画又不知其工於詩也

宿牛首寺

到寺萬緣歇蕭然宿峰頂蒼蒼野色新
漠漠秋煙暝天風在林末空翠散復整
支郎繙經處松子落古鼎微涼入虛檐
老鶴飲淺并相期話三生夜坐石根冷
疎竹何蕭蕭雲房亂燈影

徐霖二首

霖字子仁吳人徙南京補諸生坐事削籍武宗
南狩召見欲官之固辭賜飛魚服扈從還京後
歸里有麗藻堂橐周吉父云子仁詩才篆
法丹青樂府俱稱能品

詩話稱仙多能藝事書画之外工填南北曲文徵仲贈詩云樂府新傳
桃葉句彩毫偏寫詩畫所築快園康陵南巡兩幸其居有晚靜閣宸
幸堂浴龍池及扈蹕入都每夜宿御榻前與帝同卧起永陵
之初威武近幸多逮治坐罪惟子仁脫然亦滑稽之雄也

舟中雜詠二首

綠樹坐黃鸝青秧點白鷺睡起倚船窗知是江南路
今夜河西宿無眠但數更竝船何處客吹笛到天明

謝承舉一首

承舉初名璿字文卿既更名改字子象上元人

有野金子集

顧華玉云近時李西涯主清婉陳白沙主沉雅莊
定山主渾雄竝尚理致金陵有二才子謝子象徐

吳歌

秦淮女郎歌柘枝隔岸吳兒調鳳絲聲聲互荅綠楊裏

正是離人腸斷時

金鑾十二首

鑾字在衡隴西人僑居南京有徙倚軒橐

俞汝成云山人

詩多遠思
別於常調

詩話白門詩家有金琮元玉金丹赤侯金大車子有金大輿子坤金銀
竹溪均著詩集諸金之中吾必以在衡為巨擘焉其五七言近體風情

朗潤辭諸斛角靈犀近之游塵盡辟矣至若明
月照人千里共涼風吹面五更多尤為警策

立秋日呈一二知己

久雨銷長夏涼風生早秋野航如市集江水入城流迂
闊從人笑艱難豈自謀違時况多病寂寞戀交遊

登滄州城

渤海高人去仙臺古蹟存風沙吹不斷天地與同昏野
水添新漲空煙集暮村故園桑柘裏悵望一銷魂

哭湯沂東開府

赤手揮戈日丹心報主時不曾辭力盡那復計身危夜
雨藏兵峽秋風墮淚碑惟餘舊戎馬汗血至今垂

子房山

報主元非漢封侯豈為留早求滄海士晚伴赤松遊故
國山猶在黃河水自流王孫歸去好春草徧芳洲

北河道中

叢臺北向通燕谷曲渚西流繞薊門歸鳥亂啼原上樹
夕陽多照水邊村因悲俗吏趨三輔曾有新詩寄陸渾
歲歲別來春又暮幾回芳草怨王孫

重過歌臺追憶髯仙竹谿二徐老

山公曾醉習家池潦倒當年舊接羅再過已驚非故主
相逢元不是新知屏花帶雨春還麗水檻臨風晚更宜
幾度壚頭覓嵇阮紫簫攜向月中吹

除夕

還憶去年辭白下却憐今夕在黃州空江積雪添雙鬢
細雨疎燈共一樓世難久拚魚鴈絕家貧常爲稻梁謀
歸來故舊多凋喪愁對東風感壯游

送友人南還

錦堂歌出酒初陳銀燭燒殘月半輪青海共驚千萬里
白頭相對兩三人伊州折柳傷遲暮江縣逢梅入小春
去住關心各無那西風滿道起秋塵

感燕

故園門巷近烏衣但見花開燕子飛一自天涯與相別
可憐春盡未知歸綠楊庭院傳聲香芳草池頭顧影稀
何處脩梁更堪寄日斜江上倍依依

九日喜河上寇平奉簡二三知己

聞道官兵下泗州五河羣盜已全收可憐白首重生日

却喜黃花正及秋多病不妨連夜飲故人還為幾時留
西風莫趁歸心急吹落清江數點鷗

春城曲

雨餘芳草遠萋萋春暖遊人信馬蹄日暮画樓歸去晚
落花香裏路東西

寄吳厚丘

黃金散作買花資白首誰能戀故知同作孟嘗門下客
西風吹鬢獨歸時

邢參一首

參字麗文吳人有處士集

詩話麗文循者平生不事干謁苦志讀書除夜有海估以百金乞慕文峻拒之飽腹擁衣飢以待旦其介如是明初高侍郎季迪有北郭十友

麗文亦有東莊十友吳燿次明文徵明徵仲吳奕嗣業蔡羽九達錢同愛孔周陳淳道復湯珍子重王守履約王寵履仁張靈孟晉故其詩云昔賢重北郭吾輩重東莊胥會誠難得同盟詎敢忘麗文遺集罕傳子從金處士侃借得手鈔本錄竹枝一首錢氏列朝詩神鬼門載桃花仕女詩八絕竹枝三首在焉其二則山桃花開紅更紅西湖荷葉綠盈盈皆麗文集中詩所云紹興上舍葛棠夜飲圖中美人歌詩百絕侑觴乃好事者為之不足信也

竹枝詞

家住東吳白石磯門前春水浣羅衣朝來繫著木蘭櫂
閒看鴛鴦作隊一作飛

王寵三首

寵字履仁更字履吉吳縣人以諸生貢入太學

有雅宜集

顧華玉云履吉詩刻尚風骨擺脫輕靡既正體裁復減蹊徑五言沉鬱類曹植鮑昭七言跌宕類杜甫岑參近體與盛唐諸家相雄長 袁永之云王履吉綺辭壯思滔滔不休其詩初宗李既宗社去輕麗而就沉著尚鋪綴而略陶鎔 王元美云王履

吉如卿少年久游都會風流詳雅而不盡脫本來面目又似揚州大宴
雖鮮珍水陸而時有宿味 穆敬甫云履吉詩如雨後芙蓉綽約有致
俞汝成云履吉情乎義懇句秀字工在吳中可稱作者 何元朗云
王雅宜詩清警絕倫無一點塵俗氣真天上謫仙人也所欠者沉著耳
中道而天末
見其止惜哉
詩話履吉亦中材爾諸公
惜其早亡舉之未免過賞

聽琵琶

紫塞傳龍撥崑丘學鳳鳴春風吹白雪總是斷腸聲
馬千行淚明妃萬里情當杯愁未已天末海雲生

辛巳書事

居庸碣石控關門玉几由來北極尊閣道逶迤經海岱
天河隱見出崑崙斗間遂識三階列日下從知九軌奔
奠鼎卜郊非細事萬年圭鬯係文孫

虎丘送許仲貽

旗亭卮酒送君還去鳥流雲信宿間日暮銷魂此回別
望君重上虎丘山

沈翰卿一首

翰卿字子羽江陰人儒學生有石灣集

懷施武陵子羽

天子觀射臨澤宮三矢中鵠欽英風鹿鳴嘉賓慨未逢
高篇重許合大雅置之建安七子中

詩話子羽詩尚穩帖如此
語雖未工取其立格疎硬

張詩一首

詩字子言本姓李宛平人有崑崙山人集

王元美云張子

言如甘州石斗色
澤如玉膚理麤漫

詩話岳氏今兩瑤華以崑崙山人詩壓卷然詩實不工方棠陵謂之曰
君詩雖佳第情實如無山稱山無冰豨水非歡而暢不戚而哀是已
亦切中其病

送呂思抑募兵遼東

六郡募奇兵三韓列漢營甲光開絕塞海氣動高旌楊柳關山月梅花雨雪情引弓十萬眾不敢復橫行

鄭作四首

作字宜述歙縣人自號方山子往來梁宋間李

夢陽流寓汴中招致門下有方山子詩選汪禹又云宜述

詩大繫悲壯王仲房云宜述家本商賈讀書
苦吟為人負氣任俠故其詩雄渾跌宕有風骨
詩話宜述游汴際空同詩名未大盛時北面稱弟子以是空同深愛之
何大復所云老鄭空同客也其詩經空同選擇序而傳之且為作方山

精舍記又贈詩云近時好事最者誰徽州鄭
生羨愛我今觀其詩頗俊利遠勝五岳山人

聞鴈

秋日江南去春風塞北歸祇愁羅網密敢戀稻梁肥獨往寒天遠高飛舊侶稀游人夜不寐感爾淚霑衣

登高

萬里登高望烽煙接汴州愁生一作添飛鳥外心逐一作亂大江流弟妹今何在干戈卒未休前行塗路阻蹤跡且淹留

客中聞四弟消息

昨遇梁園使孤城舍弟居于戈長在目烽火不通書汝計猶長缺吾心已敞廬兩鄉千里隔相望各霑裾

除夕

除夕愁難破還家夢轉頻十年江海客孤館別離人殘
漏聽還盡寒燈坐愈親梅花滿南國誰寄一枝春

程誥 十一首

誥字自邑歙人有霞城集

李獻吉云程生詩神境融會足以散置名家 王仲房云自邑

足迹半天下其詩得山川之助為多體裁

既全篇章過富珠以沙迷反滋識者之憾

詩話自邑好為汗漫之遊山川郡邑凡所經歷必紀以詩

氣格專學空同第才情稍鈍色澤未鮮五言庶稱具體

秋陟靈金之巔由范坑過舍頭至靈陽憩方氏山館

入山恨不深采芳思凌緬戒嚴事初程憑虛瞰前峴氣
逼日始熾光滿露猶泫奔峭既厓陟盤曲亦磴轉步迅
險易踰憩頻蔭難選俯眇巢枝禽仰聆吠風犬想像巖
居人于焉傲軒冕瑤華若堪把白雲况在眼撫物興彌
敦觀化理誰遣試語同懷人竭來此樓行

遊齊山

城市意弗適煙霞夙所尚逍遙越崇堤徙倚對層嶂峽
存巨人跡亭紀使君創洞入身暫屈厓陟首屢仰雲竇
凝不開石門屹相向寄隱固我慚集仙竟誰當
寄隱集仙巖洞名也
尋覓悵遺跡歷覽訝殊狀來頻心有得興至情益放留
連暮未返引領月欲上

自秀山深入陟巘

自我客秋浦秀山亦屢入顧茲奇勝多恨未徧探歷今
晨興忽動捫葛履危岌石拂既久坐厓倚亦暫立香氣

暗忽度碧光深可挹行迷儔侶遙喜溢僕御及飄飄驚
風來陳陳吹雨急蠟屐早已著蘿衣不妨濕

登吳山

蘿磴凌晨上松門倚杖過風煙攬吳越表裏見江湖水
遠雲俱白峰高日易晡賞心延縱目邂逅此山隅

登北固山

松林度幽僻蘿磴轉孱顏眺望堪千里東南有此山江
流包楚徼地勢控吳關萬古登臨意風檣不暫閒

白沙逢余子陳却送之金陵

新詩滿行橐相見未遑論趁月浮江舸乘潮入郭門聽
歌桃葉渡問酒杏花村羨爾遙乘興無由共舉樽

峽夕

楚塞連三峽巴雲暗五溪鄉心春鴈過客淚夜猿啼百
丈緣流險雙崖壓樹低孤城丹巘麓江白露淒淒

夜泊乾灘寄肇之

江迴月娟娟蘆花渚路連暝沙團宿鷺風樹曳驚蟬廟
祭傳讎鼓津喧索渡錢愁心付漢水遙寄秣陵天

市汊驛下阻風

江干日色黃北風怒不已君看上水船一日三百里

琵琶亭

殘照亭皋夕秋風旅鴈飛琵琶千載恨淚滿逐臣衣

洛下逢汪子明

我行西入秦驅車洛陽陌相逢故鄉親况是東歸客

高 澗 一首

澗字宗呂侯官人有霞居子集

詩話少谷居龍峰北從之游者九人鄉鄰目為十才子少谷詩所云一時賢士俱傾蓋滿地萍蹤笑舉杯是也九人者高二十二宗呂居首傅二木虛次之餘有林九王七施二其名不得而詳矣宗呂家最貧少谷稱其事母至孝事兄至悌又稱其甘貧守節安安然人無知者蓋高傅為鄭門弟子之冠少谷於傅盛誇其文於高則美其行云

岳陽樓

巴陵城上岳陽樓樓外長江日夜流殘雨數聲衡岳曉
暮霞孤雁洞庭秋仙人夜奏沙邊笛估客春移樹杪舟
十二危闌間極目滿汀楊柳不勝愁

傅汝舟 三首

汝舟字木虛一名丹號丁戊山人一曰石砧老侯

官人有前丘生行己外篇

鄭繼之云生詩淵致蕭散多發之性情其道江湖林壑神仙隱

逸直臻其要妙上下魏晉抗聲于武德天寶之間大曆而還不論也
王道思云汝舟才知文采足以得意仕進獨舍去而不好其舍之盡至
於鄉井屋廬不復可居而妻子不足畜也舉一世之榮利無足好而區
區吟詠之工不能忘亦其才知所斂不可終藏而見之於此也 王元
美云傅汝舟如言法華作風語凡多聖少 俞汝成云汝舟性警牙
難於諷詠 徐興公云汝舟詩雖師鄭吏部而天然之趣尤勝如維貧
一獨能高卧縱老名山恣遠尋異書自得作者
意長劍不借時人看此等句吏部當為却步矣
詩話前丘生詩刻意學少谷子故多嶮奇語句如楚樹懸猿直衝雲帶
鴈斜宿雲長抱殿游鶴不歸松野客逢迎少山僧出入尊白為溟海浪
青盡島夷山地濕菰蒲氣風生鸛鶴毛皆錘鍊而出不肯猶人生弟汝
楫有句云種桃求漢核食棗想齊花頗饒韻致汝楫字木剡亦有詩名
時號二傅或是螯
峰九人之一乎

宿山心永樂

朝登三仰峰夕宿山心菴久入名山遊蹊徑頗盡諳始

知九曲外復有南山南森邃更險豁深篁倚煙嵐沙田
稻翼翼巖桂花毵毵疎籬隔雞犬朽樹藏蜂蠶嘗傳武
陵原奇有捕魚潭伐木不到遠却留松與楠雲光卸秋
屨回首望石龕經旬四攀眺偃息此日堪澗芹食轉美
草榻卧正酣枕中有鴻寶何必問周聃

未至白塢投宿新坪農舍

雲洞更何許新坪又一村前林露微月半嶺聞驚猿野
老不避人篝燈候茅屋始笑行路難百里已三宿

月下

月明坐空山不覺石苔冷猿嘯搖藤蘿亂我松桂影

傅汝楫

一首

汝楫字木剡汝舟之弟有卧芝集

過石田草堂哭之

頻年我理吳航至幾度相逢笑口開沙雨江風今日淚
歲寒愁絕是重來

石

麟一首

麟字永也桐城人

詩話永也白果歌載龍眠風雅未免冗長予為芟汰存之其曾祖英字
內含正統間居郭北古塘享年一百有三生七子二十三孫有同庚友
許澹初魏豁叟年九十時棄家學道不知所之內含百歲之日賦
詩憶之云庚申共守人何在甲午同生獨詠詩樹即內含所植也

白果樹歌

先人卜築闢榛蕪手種白果樹兩株愛他離離祗結實
曾無花謝花開日兩株樹各七分枝樹下人家亦七支

聞昔莫莢葉象十二月南海一風草一節由來草木知
先幾人中之幾知者稀

錢元善 一首

元善號存菴桐城人刑部尚書如京子以廕官
都督府經歷終魯府長史

春日感懷

春風三月景依然弱柳游絲觸處牽家遠隔年無信到
官閒鎮日枕書眠林鳩逐婦晴還雨沙燕將雛去復旋
遙憶故園春更好江樓背郭看鉏田

程佳 一首

佳字令甫休寧人

獨坐

空館寂無人撼撼鳴木葉乍疑風雨聲忽見當窗月

陳璽 一首

璽字德符閩縣人有守魯集

斑鳩

香禽自何處共立枝頭語喚起曉耕人西疇足春雨

徐定夫 一首

定夫字士安海鹽人有蛩吟藁

夜坐懷石林茶谷二上人

林秋萬籟集木葉下高岑佳人渺何許月明空此心夜
久河漢沒涼風飄衣襟徘徊寂無語幽意託孤琴引領

西巖下俄聞鐘磬音

戚韶五首

韶字龍困松江華亭人有集

孫貞父云龍淵詩如燕趙奇士矯伉自信又云龍淵

詩奇崛自喜

終少蘊藉

詩話龍淵遠宗楊陸近學莊陳嘗遍和谷音古詩七律頗饒跌宕之趣

孫少保毅齋合王鶴坡張一桂集題曰三詩翁鏤板傳之三君皆珠溼

鎮人也

初夏即事

綠陰清館午風涼
花落晴溝水亦香
市擔鰕魚從曉賣
鄰家櫻筍及時嘗
筐盛雜纈絲急場
撲飛蛾打麥忙
寒食過來芒種近
穀芽今似韭芽長

買舟

兩兒扶醉采芙蓉
驚喜扁舟落手中
到處溪山堪出處
此身天地任西東
出門便覺輕千里
伸脚還能睡一躬
昨與河神澆福酒
三江吹斷石尤風

自注家有與堂

和陳簡齋清明日

虛名何苦要人知
五十稱翁較未遲
造物於人固多忌
清明今日可無詩
百年臣子粗安日
八口妻孥向老時
筋力漸衰雙眼澀
一生正坐讀書癡

春日江上

江晴燕子故飛飛
江上春帆何處歸
南浦久懷芹菜美
北山初獻蕨苗肥
心驚醉語常多悔
事到中年漸覺非
明日舞雩須一往
二三童子試春衣

高閣對坐有懷鶴坡

靜裏身閑不欲眠
寺西高閣寄超然
滄波萬頃來天際
白鳥雙飛去雨邊
洗竹祠前依水檻
賣魚倉口就瀧船
王程消息三千里
惆悵鶯花又一年

傅起巖一首

起巖初名洪字晉卿
既更名字夢求無錫
人有

正峰集

京師書事次舒國裳殿撰

京國烟花重盧溝
雪樹消宮陳開帟
幄仙仗下簫韶
御酒蒲萄綠官庖
芍藥調天顏多喜氣
報捷在今朝

鈞冲玉 三首

仲玉字貞父吳江人有五浮山人集

豐存禮云鳧溪格律謹嚴神氣

飄逸不為鈞棘之語 俞羨長云孫太初一代詩豪罕有所許可獨與吾鄉鈕貞父善時相唱和 林若撫云五浮山人詩根本性情纏綿悠渺而秀骨獨存 朱長孺云浮溪隱於醫其詩出入魏晉三唐衆體咸備 金孝章云鳧溪詩鬱紆深婉雖處草莽有忠愛之思 詩話鳧溪漫臺豐存禮序之而世罕傳近其裔孫刊五浮山人集 述其當時恒與孫太初黃勉之酬和詩亦頗類太初非勉之可及

崔二丈園亭

芳園甫營葺修竹稍陰翳
村徑入沙平柴門俯江閉
惠風蕩炎氛微雨續新霽
好鳥時相鳴疎花還自媚
于焉一徜徉頗愜幽人意
寧違官府期且與鄰翁醉

返照

返照吞江色歸雲護石田
半含吳地曲不盡越山偏
萬木迴元氣羣鴉接暝煙
飄然陸魯望隨意汎湖船

微陰

雲氣微含雨江村小作陰煙中雙鳥沒天際一龍吟落日傷春事扁舟繫客心放歌巖木動隨意酒杯深

徐充一首

充字子擴江陰人有鐵硯齋集

題扇

綠樹陰中款竹扉幾家臨水狎漁磯日長門徑無車馬燕子楊花自在飛

趙金二首

金字淮獻烏程人布衣正德中詔徵不起有浮休集

詩話徵士居南潯著書闈間入其門者有如深壑恒坐小艇出入五湖陶然自酌南坦若溪二尚書紹峴山會造盧詩入社不應也年六十營蘭室斂平生齒牙爪髮之已脫者洗滌而囊盛之以為殉葬之具賦全歸詩三章其一云憶昔髫年時嘗記齒初斲歷歷真牙生蔬食藉以進邇來筋骨衰齒牙搖且振朝夕學種之種之惟自慎餘齡已七十疎豁落殆盡萬物有消長死生當委順其二云十指之爪乃筋之餘搔彼白首藉爾爬梳一彈指頃歲月其駛時或蛻之式用藏只嗟嗟此爪我心不違他日觀化亦從而歸其三云朝梳暮梳白髮滿首一朝禿盡真成老醜藏諸囊中括之無咎天地一毫惟我所有人言白髮公道不負我將全歸其顏何厚又自為生祭文輓詩自是不復出年八十九而卒其詩不蹈時習取境故超

過菱湖

去去餘不路遨遊一問津村孤船作市地絕水為鄰菱蕩官租足魚鰕野饌新衆山遙映帶相對碧嶙峋

郊居

自愛閒居卜近郊獨將心迹寄衡茅桃花水泛魚吹浪

芹草泥香燕補巢雜植桑麻供國稅細分杞菊入山肴
平生方外誰為友冷澹雲霞信可交

陳鑑 二首

鑑字用明海鹽人有句谿集

錢幼卿云山人詩鮮芳幽
精劇琢性靈絕無浮音帶

響

西村諸社友見訪雨夜分得微字

門外泥深草路微滿江風雨暗斜暉春潮正急不可渡
有酒相邀且莫歸屋帽田衣留竹桁茶煙藥火共柴扉
市招更有茶蘼帖爛醉花前願豈違

種菜

曉日園頭抱甕頻滿衣寒氣露華勻老夫一箸非容易

為語人間食肉人

徐綉 三首

綉字紹卿吳縣人有在笥集

黃清父云徐君採藻最早
享年最久其詩貴華采尚

標致經營用思愈入愈深點綴既成更務清朗吟諷再三真賞自得
皇甫子循云山人以詩名者張子言孫太初皆游大人以成名君獨不
自造請既窮已甚而志猶暢適其篇什格高調古意新句秀旨遠而辭
綉聲諧而氣宕謂不出於孫張之右邪 劉子威云蘇有兩徐生昌穀
氣俊而疎紹卿思新而緩譬諸樂
或舒以促或解以殺各以一成
詩話紹卿學詩於蔡孔目而標
格矜爽所謂弟子不必不如師

謁伍相祠

湖口風色霽繫纜登雲厓迴阡度修壟肅穆趨神祠翠
柏蔭壇宇碧草生階墀英賢去千載靈氣儼生時暉暉
燭影耀靄靄香煙滋入郢志亮畢棲越心空疲不忘嗣

主諫恐負先君知朝承錫鏤賜暮見東門師空江日夜
流忠烈何時隳至今姑胥臺空傷麋鹿馳

聞黃子得之下第

十上空垂橐三春祇弊裘說難心獨苦塗遠暮何投聞
鴈書頻繫看花淚暗流誰憐一生恨頭白在皇州

甲子除夕宿魚卿館

旅跡元無定衰情此更加飄零逢歲夜惆悵宿君家醺
筭春生綠風霏雪度花故園今夕意悽斷若天涯

姜 玄 首

玄字玄仲吳江布衣有集

錢受之云姜詩極
意陶鍊務期雅澹

詩話布衣沉思韻語具兼
陽五六之體所欠筋骨

暮秋集白陽山人五湖田舍

倚檻開湖色鈎簾見浦沙晚田惟種秫春浦亦宜瓜落
帽松風近浮觴竹日斜坐來忘出處幽意愛陶家

牧童

煙中草深黃犢肥百舌繞身原上飛斜陽幾處吹蘆笛
頭戴衣裳渡水歸

黃嘉仁 一首

嘉仁餘姚人有半山遺橐

田家

煙含暝色入村場一畝平田隔草堂急雨初收新水滿
蕩花香雜稻花香

馬駢二首

駢字共甫江都諸生

詩話共甫為知泉州府事岱之子與兄駢次甫調用甫並有詩名駢著紫泉集二十卷今失傳共甫撰有春秋探微十四卷吾鄉曹侍郎有其書而揚州新舊志均未之載也詩頗去陳言

曉行

明河欲西垂樹杪大星落隱隱遠煙消霜天一聲角

村獵

隴斷沙痕淺山空月色孤歸來夜將午射得紫顛狐

張金四首

金字子堅江都人儒士

題丁道士小房

徑晚來雨千巖秋正深潭空魚出藻果熟鳥窺林絕
壑蒼煙斷迴廊敗葉侵此中堪辟穀人世信銷沉

雨中泊太倉

太倉城河潮水生石橋西下官鼓鳴客子思家孤夢遠
舟人刺船雙櫓輕橫風倒海浪作勢急雨過山雲不行
暫時繫纜小港口城門擊柝聞初更

寓嶽祠

尋常不到山前路洞口閒雲盡日封時有聽經童子至
不知身是石潭龍

泊金閭

金閭門下燈火明吳姬水調歌入城曲終夜靜不知處

涼月滿船春水生

吳夔一首

夔字舜南高郵州人諸生

山居即事

颯颯樹頭風山犬吠不已呼童啓柴扉明月照谿水

蔡圻一首

圻字子封江都人儒士

雨後即事

亂流東下晚霞生破屋西邊落日明卷盡墨雲山雨歇
出門扶杖看天晴

陳瀛一首

瀛字古佳海鹽人國子監生選授宛平主簿

石林山房

輕風落樹散林煙海日三竿正熟眠
倚午起來花落盡不知雷雨過山田

顧文淵一首

文淵字靜卿仁和諸生有滄江集

晚發錢唐

潮平小櫂發錢唐
俄頃帆飛過富陽
兩岸好山看不盡
數聲漁笛起滄浪

楊學禮一首

學禮號東濱上海諸生

春興

菖蒲枸杞滿庭栽
書閣垂簾半掩開
蛺蝶不嫌春色澹
隔牆飛去又飛來

陳 籥 三首

籥字德音閩縣人有竹居集

送辰翁還閩

飄零同楚越
此別各風煙
後會知何日
相思動隔年
孤燈雙淚盡
萬里一帆懸
誰見家園好
椒花勝裏傳

寄訊

春風轉憶別
衡廬淮水茫茫
老客居却被故園兒女笑
至今猶作未歸書

除夕感懷

椒觴兩見客中傳
簫鼓喧喧暗自憐
縱使明朝得歸去
今宵還說是明年

朱應辰 一首

應辰字拱之一字振之寶應人應登第貢士

東湖曲

曲岸香風起汀洲
采白蘋鴛鴦浮
綠水偷眼蕩舟人

陳 宇 二首

宇字時清寧德人有五真集

宜春舟次

客塗寂寞晚風寒
舟次宜春近石灘
苦竹叢深山鷓雨

令人却憶鄭都官

園居

無事柴扉盡日間
懶情幽興每相關
却嫌新筍都成竹
遮過門前一半山

嚴時泰一首

時泰餘姚人官福建鹽運司同知有牢盆集

詩話山陰陳起侯撰浙士登科考於弘治辛酉載湖廣中式一人嚴時泰注云辛未三甲按辛未登第者乃江夏人晚以石副都御史巡撫四川陞工部右侍郎致仕楊用修贈詩所云昂昂嚴夫子矯矯人中龍長才抱經濟大雅含春容叩之清廟絙朱瑟縣之東序鏗金鑄者是其人也若餘姚嚴時泰祇官福建鹽運同知故其詩名牢盆集集中有云憶戍東南來於時歲方晏又云暮叩西禪寺又云頗為微官縛皆在隄中所賦然則用修贈詩別是一人黃梨洲徵君輯姚江逸詩誤運同即侍郎未免為起侯所惑矣

出城尋山

雅負山澤情
平明出游行
崎嶇既經丘
峻絕還陟巘
征衫清露濡
垂蘿或相罨
縈紆度林涇
草樹益蔥蒨
古洞闕無人
聊以憩吾倦
幽鳥遺好音
起覓不可見
含情倚嘉樹
日暮增繾綣
憶我東南來
於時歲方晏
春徂忽已夏
逝景迅流電
不樂復如何
嗟爾玄髮變

王瀛一首

瀛字元溟會稽人有西湖冶興

韜光菴

吟邊喜與故人登
老樹無枝石有稜
坐久江潮聽漸逝
寒山高出白雲層

明詩綜卷三十八

明詩綜卷三十八

三十七

明詩綜卷三十九

小長蘆 朱彝尊 錄

雪苑 宋韋金 緝評

姚 涑 一首

涑字維東慈谿人嘉靖癸未賜進士第一歷官翰林院侍講學士有明山存藁

靜志居詩話文徵仲待詔翰林相傳為學士及楊方城所窘昌言於眾曰吾衙門非画院乃容画匠處此何元則董說述之而曰二人只會中狀元更無餘物衡山長在天地間今世豈更有道著姚涑楊維聰者邪聞者以為快心之論然學士嘗與孫太初薛君采高子業相唱和且聞山東李中麓富於藏書特遣其子就學即徵仲去官日躬送至張家灣賦十詩送別比之魏巍萬華至其贈行序略云自唐承隋敝設科第以籠天下士爵祿予奪足以低昂其人於是天下風靡士無可稱之節者幾八百餘年然猶幸而有獨行之士時出其間以抗於世而天下之人亦罔不高之求之唐則元魯山於宋得孫明復二子豈有高第顯位為可誇哉徒以其矯世不涅之操好古自信之志足以風勵天下而一時

名流皆樂為之稱譽焉耳今之世如二子者誠難其人吾於衡山先生竊以二子比之而衡山之所造則又有出於二子之所未純者先生明經術以為根本采詩賦以為英華秉道誼以為壇宇立風節以為藩垣蓋嘗聞之却吏民之賄以崇孝也麾寧藩之聘以保忠也絕倚頓之游以勵廉也謝金張之饋以敦介也不囁於台鼎之議以遂其剛毅也不恩於輜藝之招以植其堅貞也此數者足以當君子之論而先生未始以為異也聲震江表流聞於天子之庭先生亦烏得而逃哉曩者先生之貢於春官也朝廷錄其賢拔而官之翰苑儒者共指以為榮而先生不色喜官僅三載年僅五十餘先生遽以南歸為念吾每謬言留之而先生持益堅三疏乞歸竟得請以去先生其有悟於達人之指邪嗟夫先生嘗試於鄉矣有司以失先生為恥而先生之名益高嘗官於朝矣銓曹以不能留先生為恨而先生之節益重榮出於科目之外貴加乎爵祿之上爵祿之所不能取繫維之所不能縻樊籠之所不能收彈射之所不能驚翩然高翔如鳳皇之過疏圃飲湍瀨回蒙汜下視泰山之鷄啄腐鼠以相嚇者何不侔之甚也傳所謂難進而易退易祿而難畜者其先生之徒與自大道既漓好惡立於一鄉而不可達於天下之廣毀譽徇於一時而不可合於萬世之公故吾之論先生直以魯山明復為喻而使世之觀先生者不當以三吳之士求之也釋其詞傾倒為何如者而謂學士有是言邪金華吳少君詩說議定推何太史然則元明乃好為詭語者虞山錢氏信何氏之說遂不錄學士詩未免偏於聽矣

秋夜偶成

新涼沁苧衣楚客悲遲暮林葉墮寒颼臯禽警清露銀河沒半空秋影在高樹何處洞簫聲吹徧江南路

徐階 十三首

階字子升松江華亭人嘉靖癸未賜進士第三授翰林編修抗疏論孔子廟制斥為延平府推官稍遷浙江江西提學副使入為司經局洗馬歷升禮部尚書入直無逸殿尋入東閣辦事累官少師吏部尚書建極殿大學士卒贈太師諡文貞有少湖集

錢受之云少師負物望膺主眷當分宜驕汰之日以精敏自持陽柔附分宜而陰傾之分宜敗後盡反其軀政卒為名相嘉靖中閣臣如華亭新鄭皆以文翰起家而志在經世不求工於聲律若張桂議禮諸公本非詞臣又勿論也 陳卧子云徐公經世之士其詩不專臺閣

詩話先祖妣徐安人為文貞公曾孫余少日登世經堂觀永陵手勅羅
列梁棟間蓋得君久而不衰罕有過焉者當日袁懋中於西內撰青詞
湛元明為鈴山作詩序貽笑士林而公不露所
長讀少湖文集有醇無疵非諸公所易幾矣

感興

烈風振黃塵長夜何颼颼浮雲東南來各有雨雪謀美人金玉姿煢煢倚高樓寶玦雙明珠欲致道阻修嚴霜瘁百草荏苒歲已道寒暑互代謝日月無停輶至理諒斯存耿耿生百憂冥冥雙飛鴻可望不可求

贈傳神蕭鴻臚

蕭君七年別來自江西溜以彼絕妙手寫我羸頽肌揮毫捷風雨初不經意為須臾兩徐生竝出當前楮兒童走相問何以更有茲我笑不為言視久竊自悲容顏醜

如此已見猶惡之旁觀盡才俊何由使愉怡請君為潤色稍就娉媚姿君怒不復應我亦慚無辭誓終抱此醜
亟訂漁樵期

送考功朋石楊君赴留都

昔人賤榮達今人慕通顯所履非有殊中得異深淺欣戚緣感生塵幻非實踐望賒情日悲理會境俱遣子年二十强才器重瑚璉春明去不顧此意昔所鮮因之內自媿孱鈍玷華選會當理歸楫長嘯謝軒冕

送司封仲芳楊子赴留都

哲人重道義朝貴不足縻丈夫志四方遠適非所悲如何與子別悵悵不忍辭古道日淪替羣諛紛追隨子獨

諒迂僻經訓相劇規去住忽以異麗澤安所資頽波無
停流靈耀亦西馳感此重念子何以慰爾知至理不外
得吾心實吾師願言勵操存千里同襟期

送沈進士子善尹鄱陽

治民如烹鮮此語傳自昔邇來才俊士古訓恥誦習譁
然煩其令藉口興與革遂令田野間奔走廢耕織朝廷
念元元置吏務安輯豈意更勞擾肥身重民瘠沈生起
巍科探討遍六籍况復有家教茲義諒能識鄱陽號樂
土近稍異往日撫摩還富厚夙夜在努力高才如騏驎
千里初發迹康莊與曲徑慎哉審所適

送趙甥赴衛輝幕

汝母子之姊六年長於子子昔生十齡夜燭誦詩書汝
母執女紅竟夕與子俱茲事四十年想像昨日如頭顱
各已白相望天一隅每懷骨肉情中宵起嗟吁春來獲
見汝差足慰煩紆汝今幸有官汝毋當怡愉汝本故家
子書香襲巾裾子衰媿忝竊早晚賦歸歟汝宜兩念此
奉法保民譽祿養儻能久庶報生汝劬舅甥共休戚贈
言不以諛曷哉萬里程夙夜慎所趨

送王國完東歸

春色千門柳歸航兩月塗歲更鄉夢切客去草堂孤會
合期猶阻翻飛意不無瑁湖煩問訊松菊恐荒蕪

送曹一坡判辰州

衡嶽已無鴈辰陽吁可知未愁會面阻豫計得書遲屯
戍煩兵力流亡苦歲饑若為宣帝澤遠慰故人期

瓜洲風雨不克渡江

未遂歸來願空驚歲月奔布帆三日雨茅屋數家村山
氣遙連海江聲近到門無緣得飛渡東望欲消魂

送顧起元甥婿之京

病中愁送客况復是殘年雨雪三更夢江湖萬里船天
垂龍塞沒星接鳳城懸到得燕山路應書數字傳

廣信阻雨有懷子明弟

山國夜多雨冥冥氣不分石田寒貯水松逕濕蒸雲灑
密愁仍見聲微醒故聞西堂何處所知共惜離羣

分水關

峻嶺開閩服重關限楚氛星隨分野異地漸燠涼分人
語聽難辨山名得未聞所嗟南逝水不似北歸雲

橫溪為彭允禎賦

橫溪東去水迢迢虛閣重簷共寂寥山外夕陽低度鳥
雨餘春渚暗通潮寒空落葉書聲靜秋草孤帆客夢遙
欲徙西湖湖上石為君乘月更吹簫

潘恩四首

恩字子仁上海人嘉靖癸未進士累官南京工
部尚書改都察院左都御史卒贈太子少保謚

恭定有笠江集

張惟靜云子仁詩型範自然體裁各適已深入
作者堂奧徐伯臣云笠江詩祖盛唐充然自

得 王元美云公詩根
低鄴中間及開元大曆
詩話先大母徐安人為恭定公女孫所出予七齡時塾師課以屬對不
協安人述舊事謂公六歲能調四聲因以公所訂詩韻輯略授予自是
知別四聲矣公詩凡風雅什樂府五言雜體靡不擬又
與高子業田叔禾相酬和知其用力深而取友之善也

塘上行

綠蒲生中池其葉何蒙茸與君締昏媾焉知鮮有終三
月楊柳花飛泊隨春風入沼化為萍吁嗟無定蹤衝波
一相激葉葉自西東我心元不移君情忍中絕妾生禽
不如鴛鴦故成列妾生草不如絲蘿可高揭妾生木不
如連理枝糾結越鳥豈北翥吳江不西旋妾生一以棄
苦相誠可憐恨無奮飛翼委志畢君前

從庾嶺北歸至萬安縣舟中作

嗟余謬時網作吏入西粵飽歷五嶺雲四見梅花發草
樹冬常青嵐霧晝不歇狗祿歎迷方留滯慚英達駕言
適京師歸途嶺初越忽驚險阻盡俯視原隰闊白沙綴
疎星碧水澹華月乘流耳目新破浪情神豁鷗鳥會我
衷飛鳥恣怡悅雖牽行役悲吾躬庶可閱

當陽晚行

山行日有程中路速修軫牛羊夕下來嶺日忽以盡石
滑露華零木號風力緊野燒漸已微疎星忽而隱倦翻
怯途遙迷方憐步窘僕御慘不歡勞生况多疾撫時百
慮煎于役良足憫惜哉絀冕牽久負沮溺哂

湖上

西湖如練風日清西山屏障更分明上方金碧自相映
下界鼓鐘時一鳴槐柳青溪張席罷菰蒲白水放舟行
此時政切東南想怪爾浮雲空北征

鄭曉一首

曉字室甫海鹽人嘉靖癸未進士累官南京吏
部尚書尋以右都御史協理戎政改刑部尚書
卒贈太子少保謚端簡有集

詩話端簡公家法甚嚴遺訓子孫倡優不許入門違者以不孝論屏諸宗譜之外築別業於城東北隅穿池中央四面種蔬藥賓客至者燕於池上百可亭亭陰有牡丹數本嘗與夫人玩花豚一蹄魚一尾雞子四枚酒三行而已嗣先妣孺人為公來孫子嘗讀書其地芋魁芥孫豆棚瓜堰恍若深村今已屬之他姓矣公銳意經史學韻語不多作然曾刊鳴唐萬選絕句以行非不留心風雅也

彭城

彭城天下險萬里接河源落石東南斷飛濤日夜喧江
淮連絕島齊魯入平原寄語當關者征求無太繁

張時徹 七首

時徹字唯靜鄞縣人嘉靖癸未進士授兵部主
事改禮部出為江西提學副使歷福建參政雲
南按察使山東右布政使河南左布政使以僉
都御史撫四川再撫江西遷南京刑部侍郎改
兵部進尚書有芝園集

楊用修云芝園匠意鑄詞色具體備江于順云唯靜立格漢魏取材六朝而音節變調出入開寶之間情屬景生神在象外錢受之云尚書詩學殖富有工力深重樂府古詩興會標舉時多創獲七言今體塵空蕪穢若出兩手陳卧子云司馬樂府頗有造構近體宛情麗逸如層臺佚女意帶雲霞詩話芝園樂府不規摹古人較之濟南覺勝五律頗近初唐七律潦倒麗疎無譏焉已

彭彭者車 五章

彭彭者車于彼河洲有美丹漆不以飾輶彼君子兮使
我心憂一 彭彭者車于彼河側矯矯騏驎不以服輶彼
君子兮使我心惻二 爾之弦矣衆維韋矣爾之石矣衆
維脂矣匪爾圖之狂維衆之迷矣三 矢之既釋不可反
也錦之既張不可卷也我生有定終不可轉也四 修靈
疆畎藝爾黍稷保艾爾生夙夜無斁如彼見龍時哉斯
匿五

秋胡行

衆鳥有匹胥遨以遊擊而有別實惟睢鳩彼誰者子矯
矯卿侯突而好我中心孔羞卿有婦兮妾有夫悅彼姝

子曾睢鳩之不如子一解 倉庚喈喈春日載陽執我懿

筐采彼柔桑彼誰者子車馬龍驤含情流睇黃金是將

獸有穴子鳥有林卿有金子不如我有心子二解 明明

日月照臨下土女子有行畏彼多露彼誰者子繡衣朱

輅美也可悅不念其故山有木兮水有魚子不信兮孰

可與同居兮三解

北征雜詠 二首

養鳥莫養鸞藝麻莫藝蘭芳香難為用過美多憂患田
甲賤死灰白日摧冰山時運有來去禍福無定端周道
蕩如砥朱門競彈冠咳唾生風波誅奪在一言日月不
常盈人生豈得安栖栖巖穴士無為恥泥蟠

明言卷三十九
義和無停軌寒暑更相易歲暮誰不歸獨為遠行客荆
榛當路衢烏鳶翔我側疾風吹沙塵白日忽以匿筋骨
既憔悴感此增怵惕悠悠赴壑鱗戢戢歸林翼物性有
如此行役不遑息閭闔不可攀閭風不可即果腹適莽
蒼浩蕩將安極

長安道

月曉一作曙動開長樂風清一作鶯啼遶建章龍媒馳道出鳳吹彩旌
揚繡陌生朱霧銅溝映綠楊渭橋春水漲日日浴鴛鴦

齋居

紫闕風雲迴彤庭日月臨明禋昭代典肅戒小臣心
露寒偏渥星河夜不沉長安千萬里應獻太平吟

閭閻曲

穀熟不到釜絲成不上身莫道江南樂江南愁殺人

歐陽德一首

德字崇一秦和人嘉靖癸未進士累官禮部尚
書贈太子少保謚文莊有南野集

送胡九峰改太常少卿北上

丹楓江上路送爾倍沉吟南北如相避誰從話此心漸
鴻遵月渚倦鳥怯雲岑孤負溪山約臨風撫素琴

馬坤一首

坤字順卿揚州通州人嘉靖癸未進士累官工
部尚書有石渚集

苦雨

南國春來不肯晴陰雲接地暗山城翻風何事鶴一作雙
下喚雨忽聞鳩一鳴處處蠶飢吳地妾牀牀屋漏杜陵
生鶯花三月空無賴獨掩柴門對短檠

朱廷立一首

廷立字子禮通山人嘉靖癸未進士除知諸暨
縣入為監察御史升南太僕少卿終禮部右侍
郎有兩厓集

杜宇

愁烟積雨過芳辰乍喜濃陰綠樹新杜宇多情啼不歇
山中可有未歸人

吳鵬五首

鵬字萬里秀水人嘉靖癸未進士累官吏部尚
書加太子太保有飛鴻亭集

詩話尚書居里門不自韜晦以是鄉人皆惡之曾有詔許佃浮屠廢寺
為民居公子繼翰直於官請佃楞嚴寺隙地且酬僧徒以白金四百兩
因葺野樂園蓋與勢佔者稍有別矣園有堂曰先瀛前為圃曰閒間曰
倚倚曰忘機曰都春門曰吾如所堂後有樓曰雲日樓前亭二曰漱芳
曰臨賦小沼環之左右齋各一曰悟真曰守虛園成尚書自為作記告
誠其子謂宮室勿崇土田勿闢輿馬勿飾服御勿奢饗餼勿珍執業勿
懈交游勿濫鄉鄰勿競施予勿吝諍受勿苟觀其出言也善方諸席寵
滅義以惡終者亦有間也尚書詩文頗條暢特少警策當在徐沛拯民
之繼載漕糧數萬發之而後請命又敗永城賊師詔
於五河騰略亦有過人者比於吳之陸完差可恕爾

潞河發舟

解纜催笳鼓青春萬里行煙籠提柳密水泛野鳧輕獨
立思王事無才補聖明此心懷魏闕惆悵櫂歌聲

永平道中

疎雨未滑道秋風隨使輶
磴危頻下馬溪斷不逢橋
板屋居何陋蒲蠻習更驕
暝投孤館宿寂寞聽鄰簫

夫椒山

夫椒山前孤草亭天風颭颭秋冥冥
客來獨鶴忽飛去七十二峰湖上青

舟行雜詠 二首

山花瑣細蒺郵亭小艇漁歸水氣腥
一路東風嘶去馬土牆斜颭酒旗青
驛亭素壁上苔痕亭下奔流淨不渾
慣是秋河愁汎濫漁家偏占白鷗村

屠大山 二首

大山字國望鄞縣人嘉靖癸未進士累官兵部左侍郎巡撫應天與倭戰失利被逮繫獄既而

釋歸有集

屠長卿云公歸田後與里中故人縱飲酒酣援筆作歌了不求工而往往神來非詞人嘔心所得

雜詠

古道有蒺藜行者戒經過新徑富桃李過客肩相摩
古道日以微新徑日以多江河逝悠悠歎息將如何

聞道

聞道黃河套年來勢不同驚塵昏陝石邏騎薄遼東
五月金符動三軍鐵馬雄何當清絕域再見幕南空

李仁 一首

仁字元夫東阿人嘉靖癸未進士累官右副都

御史有吾西遺橐朱中立云吾西清婉和粹有中唐餘韻

茂欽至得德兆起居

不見黃生久天涯怨索居椒蘭懷楚客冰雪斷江魚白
日登山屐青春負郭廬虞卿能發憤會見早成書

李宗樞一首

宗樞字子西富平人嘉靖癸未進士除諸城知
縣徵拜監察御史出為河南僉事歷僉都御史
撫河南

度居庸關

峻壁含雲迴飛湍接澗迴虛聞三峽險疑是五丁開荒

樹分天宇驚沙暗戍臺祇慚持節度豈是棄繻來

劉隅一首

隅字叔正東阿人嘉靖癸未進士授福建道御
史出為四川按察僉事坐謫稍遷永平知府升
河南副使進按察使以右僉都御史巡撫保定
終右副都御史有範東集朱中立云範東意氣安閒辭旨沉快有杜陵遺意

過宿州

憶昔乘輶過霜飛楚甸清十年頻去國此日重合情浦
樹浮烟遠河流入海平山川望不極春草徧王程一作伴孤征

李舜臣二首

舜臣字懋欽一字夢虞樂安人嘉靖癸未會試

第一由戶部主事改吏部歷考功員外郎出為

江西提學僉事改南國子司業轉尚寶卿久之

召為太僕卿有愚谷集孔汝錫云愚谷詩優柔涵泳粹然

才名相頡頏竝由吏部左遷竝以京堂罷免皆為權貴人齟齬伯華縱酒度曲頹然自放懋卿意經術兩人學業不同而志趣詎合三齊之士屈指先輩

必稱二李焉

詩話李獻吉有九子詩李伯華仿之亦作九子詩以懋欽為首次以劉子素又次羅達夫餘則呂山甫熊叔仁唐應德趙景仁王道思潘子抑也子抑名高太原人王恭襄瓊女壻中嘉靖壬辰進士以翰林編修建言罷官伯華詩所云貴人懷私憤假公得一逞也又詩云潘君氣最豪

權貴等鴻毛身廢談邊務家貧賣寶刀又云有書過千卷有田不一頃亦一負奇之士所著春谷集不傳李伯華輯明雋僅錄其一詩而已近見晉人編仕國人文竟不及其姓氏惜夫

初度友人過飲

乍喜高軒過還驚短髻催相看俱老大相慰是歸來濁

酒家能釀黃花手自裁今宵踏明月莫惜醉中回

徐錦衣西園

暖日紅芳樹晴烟碧小溪春風二三月定有好禽啼

陸銓五首

銓字選之鄞縣人嘉靖癸未進士除刑部主事

諫大禮廷杖遷兵部員外轉禮部郎中為張孚

敬所忌出為福建按察副使歷廣西按察使廣

東布政使有石谿集

詩話石谿論詩專以性情為主嘗曰宋人不能為唐唐人不能為漢魏時為之也其偶似者宋之似唐唐之似漢魏爾故諸體不沿時習五言如鳥白雲中樹山青雨後峰亂帆爭入浦羸馬怯過橋越竹成游轆吳蠶吐釣絲七言如山田雨足秋仍熟石室風高夏亦寒絕壁有松人不到深林無主鳥相忘沙頭水急潮初落山腹烟多雨未收野樹巢空鷺鶴去淺沙船動覺潮來輕便度嶺雙肩轆小可穿橋獨槽舟一別動經

日言卷三十一
千里關百年消得幾回忙皆非陳言也至若獄中次季舉之韻
云聖怒不妨為孝子狂言豈敢託忠臣庶幾哉忠厚之遺矣

民謠

毀我十家廬構爾一郵亭奪我十家產築爾一佳城官
長尚為役我曲何時直本是太平民今願逐逋客

撥悶

修塗密春雨新水浮磽田灘聲起林杪浦色迷遠天溯
游違水性力挽苦不前歸情逐飛鳥度日長如年前村
靄雲樹望久生夕烟來船翼雙櫓疾若矢發弦勞逸迴
倍屣遲速殊相懸事以乘機易力因失勢捐引觸悟至
理何獨舟行然

湘湖與陳見吾同遊

陳侯慷慨作賦才置酒攜我湘湖隈湘湖去縣十二里
津吏伐鼓廚船開須臾山曠湖風發船頭噴浪聲如雷
酒酣日落鳧鷖亂振衣倚櫂登荒臺人言夫差昔困越
直待烏喙行成迴至今山腳號排馬天風颯颯吹枯葦
十年轉盼似昨日敗軍勝將同灰埃陳侯歸去來
登舟長嘯且銜杯眼前功名亦吳越吳越于我何有哉
再和宣明館陽明先生韻

五色晴江雨後痕亂峰雲氣月華渾邊陲萬里還通驛
盛世深山亦有村興至欲穿雙屐去愁來只對一燈昏
夜郎詩思知多少恐有當年遷客魂

清明

清明日薄晝陰陰籬外新秧短似鍼縛草象人田畔立
借他風力逐飛禽

顧夢圭

五首

夢圭字武祥崑山人嘉靖癸未進士累官江西
右布政使有疣贅集

詩話武祥清約自居有同寒素當參議粵藩賦詩云夏月行部至雷州
思製一葛且復休冬月行部至廉州思製一裘且復休故衣雖穿尚可
補秋毫擾民亦苦胡威之清何以過此呂仲木
擬梅花贈之曰武祥如此花矣聞者以為美譚

擬古

雖雖雲中鴈八月徂南方念彼北風來怛焉懷稻梁九
月氣已淒十月繁冰霜生成一作來毛羽單高飛不成行君
門有鐘鼓聽之徒自傷

灑縣行

入城半里無人語枯木寒鴉幾茅宇蕭蕭酒肆誰當壚
武清西來斷行旅縣令老羸猶出迎頭上烏紗半塵土
問之不荅攢雙眉但訴公私苦復苦雨雹飛蝗兩傷稼
春來况遭連月雨縣城之西多草場中官放馬來旁午
中官占田動阡陌不出官租地無主縣中里甲死誅求
請看荒墳遍村塢

珠池歎

并序

廉州平江青鸞楊梅池雷州樂民池產珠地也
先朝率十五六年或十年一採始得美珠上供
邇者三年再採珠已竭矣所得皆碎小藩臬有

司竝受詰責不知此物生息甚難取之太頻安
得圓美每採費舟筏兵夫以萬計頑悍之民因
緣為盜今雷廉凋敝已極採取不止將有他虞
余承乏攝此事儻議復採當疏聞聖明必不以
無益害有益也

漢家嬪嬙無麗飾南海逍遙養泉客昭陽新寵關新妝
照乘之珠苦難得孟嘗美政龔黃班今人反怨珠來還
璽書三年兩頒降驪龍赤蚌皆愁顏往時中官涖合浦
巧徵橫索如豺虎中官去後璽書來誰訴邊陲無限苦
野老村童不著禪四山戎馬夜紛紛竹房無瓦竝無粟
猶折山花迓使君

感事

畫戟門前車馬稀東市灑血沾朝衣中台轉盼無光輝
華亭唳鶴聲哽咽月中空喚行人歸

謁康陵

早霧籠山暝新松匝殿稠三邊餘武烈八駿想神遊花
萼皇情遠衣冠歲事修傷心大宮酒猶得獻千秋

高叔嗣 二十二首

叔嗣字子業祥符人嘉靖癸未進士授工部主
事改吏部歷員外郎中出為山西參政終湖廣

按察使有蘇門集

廖鳴吾云詩人之有事於楚者若邊廷實
之冲澹徐昌穀之超逸李川父之脫灑高
子業之奔放咸足被之廣奏登之升歌洋洋乎其盈耳也哉 陳約之
云子業謝絕品流因心師古每有屬綴佇興而就寧復罷閣不為淺易

往往直舉胸臆刮抉浮華存之隱冥獨妙閒曠有蘇州之冲澹兼曲江之沉雅體王孟之清適具高岑之悲壯詞質而腴興近而遠洋洋乎斯可謂之詩也已 蔡子木云蘇門詩在我朝當屬第一 李伯華云何李雖是大家去唐却遠蘇門雖云小就去唐却近蔡白石王巖潭以為國朝第一其言雖過要之不可盡非也 王元美云高子業如高山鼓琴沉思忽往木葉盡脫石氣自青又如衛司馬言愁憔悴婉篤令人心折又云高子業空谷之幽蘭崇庭之鼎彝也又云刻羽雕葉舍陳而新吾推子業然不能諱其從 王敬美云詩有必不能廢者雖眾體未備而獨擅一家之長如孟浩然沈沈易盡止以五言雋永千載並稱王孟我明其徐昌穀高子業乎二君詩有不同而皆巧於用短徐似高韻勝有蟬蛻軒舉之風高以深情勝有秋閨愁婦之態更千百年李何有時發興二君必無絕響 吳明卿云蘇吉仲默竝策上駟而馳中原子業雖驂駕第緩轡後至耳 劉初叔云蘇門思悟入玄詩在晉魏初唐之間 顧玄言云參政詩若磊磊喬松凌風迴秀響振巖谷 胡元瑞云高子業視李何後出而其五言之工不欲作今人一字在唐不減張曲江韋蘇州矣又云弘正五言律自李何外如薛君采之瀟灑溫醇高子業之精深華妙置之唐人毫無愧色然二君俱不能為七律高蓋氣局所限薛由工力未加 黃清甫云高詩綽有意見不假綠飾吐言成章誦之若落落直致而中自豐腴 馬仲良云羊孚有言資清以化乘氣以霏遇象能鮮即潔成輝四語可画一子業也 范介孺云子業多韻連之致惜未竟其詣 錢受之云子業少受知於李獻吉弱冠登朝薛君采一見歎服詩以清新婉約為宗未嘗登壇樹幟與獻吉分別瀟灑

固已深懲洗拆之病而力砥其膏肯矣其意微見於讀書園彙序中約之為疏通證明暢言其脈絡世之君子墮落北地雲霧中懵不知返亦可以爽然而悟矣 陳卧子云子業沉婉雋永多獨至之言讀之如食諫果味不驟得又云子業詞存清曠意成淒楚 李舒章云子業如疎林清磬聽者振衣

詩話嘉靖初後生英俊稍稍厭棄李何子業以吏部郎謝病歸時獻吉留開封辭必摹古子業自序讀書園彙謂本非所長而強力慕之度必取調於眾其立意固殊讀其詩如食哀家梨止渴雖爽而不伐性如水精盞進酒雖薄亦能醉人李中麓六十子詩於子業有云蘇門能入室何李只升堂其傾倒也如此

古詞

荆和當路泣良璞為誰明
茫然大楚國白日失兼城
燕石十襲重魚目一笑輕
古來共感歎今予益吞聲

再調考功作

引疾三上書微願不克諧
徙官復在茲心迹一何乖
軒

裳日待旦閭闔凌雲排入屬金馬籍出與羣龍偕積賤
詎有基履榮誠無階但惜平生節逾久浸沉埋既妨來
者塗誰明去矣懷烏迷思故林水落存舊涯唯當尋素
業歸卧守荆柴

益藩嶺南云委
婉非俗客能道

秋情

涼風吹庭樹蕭然已暮秋歲運空云往客行胡久留良
時每易失微志果難求餘光儻可積但空成山丘

病起偶題

空齋晨起坐歡遊罷不適微雨東方來陰靄倏終夕久
卧不知春茫然怨行役故園芳草色惆悵今如積

雨中簡子仁員外

積雨曠朝暮層城苦沉沉端居誰與言抱此懷人心一
為軒冕拘遂便名跡侵長媿玄豹姿隱霧南山岑君通
微妙理佇想開塵襟

簡棗永之獄中

本同江海人俱為軒冕誤子抱無妄憂余有多言懼昔
來始青陽今此已白露豈乏速進階苟得非余慕罪至
欲何言直以愚慵故衆女競中閨獨退反成怒追誦古
時人蒙冤誰能愬皇心肯照微與子齊歸路

元日同谷子延賦

雄都盛賓客車馬爭馳騫芳辰啓初年宴飲多所務不
知灌園身何為迷方誤郊館抗空壑山扉啓峻路良朋

平生歡就我今朝步城因竝舍登徑為穿林度微陰原
上明片日雲中霧青霞照深池白雪停幽樹共貪歲欲
新不厭日旋莫農田方在茲君豈數能顧

益王嶺南云
造語精綺

敘懷

生長夷門郭往來莘野路家貧無良謀躬耕有遠慕始
窮伯王略遂覽生民故曰余本空疎當年恣高步慶彼
鳴鶴期忝此飛龍顧亦知敝帚材早享千金誤日月不
我留撫心慙往素

益王嶺南云
辭意俱古

移樹道上

春園就蕪穢雜樹生蒙密不知雨露功長養何多術婆
娑使人憐斬伐終余恤乘時聊徙植予以託吾室交生
兩相當列映直如一轉令門巷新遂放雞豚出修修原
上風團團村邊日紛吾本蹇劣兼爾抱憂疾敢學成都
桑而謀荊州橘願及垂陰成初志儻此畢

歸次南關驛

祇役忽于今徑塗宛如昨秣馬息荒林振車越重壑歲
暮滯還期客心悵不樂曰予本沉冥遭時乃濩落化海
異微禽蟠泥豈尺護方因遷斥餘始遂歸來諾逝將入
雲峰滅迹從所託

送別德兆武選放歸

燕郊秋已甚木葉亂紛紛失路還為客他鄉獨送君罷
歸時共惜棄置古常聞莫作空山卧令人望白雲

明言總卷三十九
春夕同李考功道舊

下馬春庭夕明燈夜雨深人多新歲感日有故園心磨
滅名題柱淒涼賦賣金十年同省舊誰念各如今

賦得嶧山碑送李東升明府

秦皇千載後嶧嶺尚遺碑斷石青山路孤城滄海濱蕭
條餘霸氣磨滅想雄辭君到鳴琴暇應多弔古思

得張子家書

晚日照餘晴荒亭暗復明歸雲度深樹飛雨過高城蹇
劣慚當代棲遲笑此生空持一書札長歎故人情

雨後有懷子延

驟雨新秋晚微晴墟落間悠然抱藜杖率爾倚柴關空

壑纔容水流雲故滿山遙知城市裏應羨此身閒

西園再酬谷子延

茅屋還相見冬郊那可聞荒城連凍浦落照與寒雲遠
樹行時倚歸塗到處分留君終日語猶自日思君

武城漕河逢張使君憶考功舊寮

岸坼留餘照舟行稱晚風歸心千里倦行役一時同置
酒滄波上停橈綠樹中思君如河水何日不朝東

送別蕭司勳

柴門夜語罷惆悵出前林曉日孤村映秋風落木深別
來生白髮歸去換愁心還復茅檐下朝朝鳥雀吟

井陘道中

曉霜塗屋重寒日出林微改轍辭邊徼登車望帝畿深山藏驛道巨壑斷村扉欲問前征侶迷津何處歸

晚趨忻口

雲峰聊極目立馬獨愁心豈直關山遠其如雨雪深笳聲先入夜邊氣迴生陰疇昔長征意蹉跎力不禁

沁州張源舖

去國三年意還家此日心天寒客路永日暮衆山深沙塞人偏老風霜馬不禁如何更萬里投跡楚江陰

送管平田先生頒封秦府歸省

五等周分國三王漢世家日聞敷帝族時見遣皇華剪土仍鶉首疏邦自犬牙秦關通使節灞水渡征車過邑

恩難屢登堂禮更嘉何如北山客行役動長嗟

葉份一首

份字原學婺源人嘉靖癸未進士歷官山東提

學副使有蓮峰集

江禹父云原學詩平安中有逸思

夜泊壽春驛

萬里愁行客孤槎自使星人烟昏晚渡漁火亂風汀桐柏長淮水松杉古驛亭誰家吹短笛淒斷不堪聽

周易一首

易字時伯蕪湖人嘉靖癸未進士歷官提學副使有赤山集

春眺兼簡楊石巖

野曠春猶淺山明雪正殘楚雲棲樹濕淮雨過江寒酒
醒頻看劍愁深獨倚闌客從天上至猶道未回鑾

陸冕 二首

冕字宗周崑山人嘉靖癸未進士除禮部主事

歷官陝西按察副使

周子籲云宗周律已廉介詩雅健清古

西夏曲 二首

秦關百二古稱雄寧夏山河襟帶同天險皇圖元自固
從前失策自和戎
校獵河西日未曛撥金伐鼓動風雲還軍飲馬長城窟
野馬黃羊各百羣

韋商臣 一首

商臣字希尹長興人嘉靖癸未進士除大理評
事疏救議禮諸臣廷杖謫靖江縣丞累遷四川

參議有南苔集

詩話南苔世為廉吏時以比胡威父子歸田後與蔣恭靖瑤劉清惠麟
孫僉事濟蔡同知玘唐主事樞陳參政良謨顧尚書應祥吳太僕龍朱
太守懷幹張通政察施知州佑李知縣丙吳副使麟參政龍一十五人
結峴山逸老之社雖饑饉不給而春秋必赴能不改其樂云父厚字原
載中成化丁未進士仕至黃州同知有翠屏詩集不傳
雲峰者名雲鳳烏程人官刑部主事蓋續入逸老社者

秋社和朱雲峰韻

近圃青千疊遙山碧四圍舟從天際至觴向雨中飛殘
暑蒲葵扇新涼薜荔衣更憐天欲霽返照弄餘暉

鄔紳 一首

紳字佩之丹徒人嘉靖癸未進士有中憲集

明詩歸卷三十九
寄汪水部淵之

憶昔河梁別春華委芳樹流光何迅速朱夏忽云暮園
林莎雞鳴檐隙疎螢度向晚輟簿書中庭澁微露搔首
重踟躕無亦以君故使者舒城來多君眷南顧遺我以
先春開我以尺素殷勤報秋期江皋諧夙晤我欲往問
之蒼波渺烟霧悵望寂無言鳴琴寫情愫

陳 袞 一首

袞字邦進寧德人嘉靖癸未進士有騶山集

燈花

倦矣經年客歸與萬里家遠書期不至空自卜燈花

馮世雍 一首

世雍字子和江夏人嘉靖癸未進士歷官徽州
知府有三石橐

赴滇南煙莊道中

碧嶂千峰合黃茅一徑開馬從危石度人自亂山來暝
樹青溪濕寒雲白鴈哀漫停湘浦駕遙望漢江臺

劉汝松 一首

汝松字貞吾歷城人嘉靖癸未進士歷官知府
送李進士之京

春風吹岐路朝日照高城青陽旣駘蕩林薄亦芬榮之
子去安適迢迢入承明皇居一何麗雙闕凌太清白馬
振長綏丹陛羅羣英匪才慚寡用高步羨芳聲盛年志

四海豈徒夸令名

朱澗 四首

澗字必東莆田人嘉靖癸未進士授湖廣道御

史建言廷杖放歸有天馬山房遺橐

林雨可云損巖下筆清健一種

疎宕之氣足以移人性情

詩話興國太后將至禮部議由東安門入覆議由大明左門入張璠曰雖天子必有母也焉可由旁門入乎於是從大明中門入在永陵意中惟知有興國太后而已嘉靖三年值慈壽皇太后誕辰有旨命婦免朝賀損巖上言興國太后朝賀既已舉行慈壽誕辰乃聞報罷事體相類禮數頓殊臣切念武宗上賓蒼生無主當時為孝廟後者惟慈壽所欲立爾手擬神器親授吾皇孝宗在天之靈所以望陛下之事母后者何如天下臣民之心所以望陛下之事母后者何如今乃旬月之間一舉一罷彼此相較形迹太分何以慰孝宗在天之靈副天下臣民之望疏入永陵震怒匪蔣文定力救不能生矣同時疏諍者馬侍御明衡也二公可謂格君心之非者損巖詩無俗韻誦之想見其人

歲暮山中

種梅山逕邊下有牛羊道童豎恣攀翻糾纏易枯槁殷勤謝鄰翁愛此寒花好放牧須前山前山足豐草

飲黃石友人黃正可晚青亭和師山題壁

漫影落名山歲月累云周如何咫尺地茲亭今始游小草冒庭戶寒花明牆隙撼撼高樹聲蕭然似林丘西風天欲暮雨意鳴靈鳩主人有好懷開尊更獻酬相與各賦詩談笑銷百憂愛此同游人俱維靜者流盍簪誠足樂萬事吾何求

贈豐山陳子廷

我愛豐山無俗韻時時來往小齋中野情自比天隨子詩句多師陸放翁環堵蕭然無一物才名早已動諸公

長吟盡日不知厭興入冥冥海上峰

草堂前芙蓉正吐口占

清霜一夜老蒹葭牆角芙蓉漸著花猶憶昔年江上看
西風吹夢客思家

盧襄一首

襄字師陳吳縣人嘉靖癸未進士官職方郎中
有五塢山房橐

一谿

一道縈村曲何年有此谿微風生細浪過雨失平堤漁
澹舟相續仙源路不迷幽棲我亦戀夢繞石湖西

狄冲七首

冲字仲虛溧陽人嘉靖癸未進士歷官南京工

部郎中有春谿集

陳山父云春谿思致雋爽體裁各執其度音調亦適

詩話春谿歷仕不達晚乃為郎故其詩云官衙四轉轉萬里垂老始博尚書郎其詩清澈類楊夢山特全篇合作者少

臨淮思

淮之水兮清且瀏思若人兮情夷猶逝予舟兮夕逝願
從之兮靡由淮之水兮清且駛思若人兮不能已抱多
病兮焉投隔淮湍兮千里淮之水兮洋洋睠我情兮難
忘永悠悠兮冬夕輾轉反側兮未央悲莫悲兮生別離
我思君兮君不知臨北風兮隕涕屬孤雲兮南馳

東寺竹

林鳥已春聲林竹尚寒影豈無竹外花愛此晚色靜寒

蘿拂苔石透手弄清冷飛鼠迭相竄驚鱗時一逞慙非
海上翁動物見猶警

自銅仁至八盤

岑巖度修坂窈窕穿林木野燒楓半枯陰厓草全綠獸
鋌或衝人鳥嚶如度曲羣猿不畏人聯臂下江浴人言
此道險欣籍吾方足肩輿吟且眺一一得所欲月出江
上峰夜上峰頭宿何似長安塗飛埃眯人目

德州道中

遠道嗟難到舟行觸凍流山城寒擊柝客夢夜封侯岸
鳥棲還警村猶吠不休篙人真楚產助力發蠻謳

谿上

原樹明殘日谿風埽斷雲衆山圍野竝一水向田分魚
戲推萍轉樵歌隔嶼聞隱居逢此地無事歎離羣

冒雨入白鹿

樹杪雨來風有聲肩輿且竝樹邊行路傍鳥去葛花落
水面魚游蓮葉生山接流雲多變態澗添行潦亦爭鳴
此來老子興不淺巾折衣霑踏草坪

喜晴

東郊奄奄雨意足南郭浮浮雲脚收鷓鴣刷翎水北岸
蜘蛛添網門西樓虹垂古澗青紅氣日射蒼波紺碧流
曾苦妨農何事喜桔槔閑卧夕陽洲

柯維騏

二首

維騏字奇純莆田人嘉靖癸未進士官南京戶

部主事有藝餘集謝山子云先生開戶五十年放意著述自成一家詩以積學勝人不易託

詩話宋遼金元四史惟金史差善其餘潦草率豈金匱石室之所宜儲希齋撰新編會宋遼金三史為一以宋為正統遼金附焉升瀛國公益衛二王于帝紀以存統正亡國諸叛臣之名以明倫列道學於循吏之前以尊儒歷二十載而成書可謂有志之士矣其詩文曰藝餘者編宋史之暇作也先是揭陽王昂撰宋史補台州王洙撰宋元史質皆略焉不詳至柯氏而體稍備其後臨川湯顯祖義仍祥符王維儉損仲吉水劉同升孝則咸有事改修湯劉臺尚未定損仲宋史記沉於汴水余從吳興潘氏鈔得僅存然三史取材紀傳則曾鞏王偁杜大圭彭百川葉隆禮宇文懋昭編年則李燾楊仲良陳均陳桎禮樂則聶崇義歐陽脩司馬光陳祥道陳暘陸佃鄭居中張暉職官則孫逢吉陳騭徐自明輿地則樂史王存歐陽忞稅安禮王象之祝穆潘自牧著錄則王堯臣晁公武鄭樵趙希弁陳振孫類事則徐夢莘孟元老李心傳葉紹翁呂中馬端臨趙秉善劉祁述文則趙汝愚呂祖謙諸書具在以予淺學亦曾過讀其他宋金元人文集約存六百家郡縣山水志以及野史說部又不下五百家及今改修文獻尚猶可徵予嘗欲據諸書考其是非同異後定一書惜乎老矣未能也

別黃道卿

繁霜肅野草迴颺振城樹胡為子遠行但茲歲云暮我
屨不出門為子臨岐路子驂亦暫停豈不以我故我如
蒿下鳥子如雲中鷺動息各有宜安得長會晤會晤不
須期努力慰所慕

宏路驛

雨歇江天淨山迴驛路遲客愁新歲減風物故鄉宜花
事餘梅蕊樵歌綴竹枝祇慙司馬病深負好文時

豐坊一首

坊字存禮鄞縣人嘉靖癸未進士除禮部主事
以吏議免官家居坐法竄吳中改名道生字人

翁有南禺集

張惟靜云存禮質稟靈奇才彰卓詭論事則談鋒橫出摘詞則藻撰立成士林擬之鳳毛藝苑方之

逸駟然而性不諧俗行或盤中片語合意輒出肺肝相啗睡毗蒙噴即
援戈矛相刺亦或譽嫫母為婢媚斥蘭荃為蕘荼菊若無人罕所顧忌
知者以為激詭不知者以為窮奇也由是雌黃間作轉相詆謔出有爭
席之夫居無式閭之敬鶉衣繼縷濕突不炊僮奴絕粒而逋亡賓客過
門而不入頗頹窮獨以終其身不亦悲夫 王元美

云豐道生如沙苑馬駑駿相半恣情馳騁中多敗蹶
詩話南陽釋褐後從其父學士熙諫大禮受杖闕下人方謂學士有子
矣逮父卒戊所乃言非父本意忽走京師上書請追崇與獻王宜稱宗
入太廟永陵用其言而不錄其人也歸益狂誕恃才傲物作偽欺人撰
子貢詩傳中培詩說魯詩世學古書世學石經大學竄易經文別裁異
議一時若泰和郭氏京山李氏澄海唐氏多惑之而不知本邪說也其
園一序可當聲罪檄而憐才美意是寓其中此等人第作犬豕相遇可
耳詩不必存錄而論列
之期以祛後人之惑也

十月十一日作

去國已逾紀玄節及茲臨修軌忽電逝壯懷終陸沉淒
淒寒露結慄慄悲風吟芳草委遙澤驚鳥翔空林朝飛
尚蠲羽夕寐惟蟲音馳情有斷簡卒歲無重衾餘悰奚

足道雲海勞予心

明詩綜卷三十九

目言終先九二十六

三十一

